

# Мусулмон боланинг китобчаси

Эътиқод, тарих, ибрат, одоб

Мактаб ёшидаги болалар ушун илк Ислом дарслари



Ҳассон ибн Собит

1424 ҳ. - 2003 м.

❧❧❧

Саҳифаловчи: Абдуллоҳ Ўзбек

Веб саҳифа: <http://ahliilm.com/>

Телеграм: <https://t.me/Ahlililm>



## Ота-оналар ва устозларга

Фарзандимиз ёшлигидан бошлаб эътиқодли, билимли, одобли, ва ғайрат-шижоатли бўлиб ўсиши учун унга қандай тарбия бермоғимиз керак? Болага гўдаклик чоғида нималарни ўргатиш лозим? Бунинг учун қайси адабиётларга мурожаат қилсак бўлади? Табиийки, бу саволларнинг жавоби жуда ҳам ўнғай эмас. Болажонларнинг исломий кутубхонаси ҳали анча қашшоқ. Қўлингиздаги китобча шу муаммони ҳал қилиш йўлидаги кишик бир қадамдир. Китобчада катталар учун ҳам муҳим саналадиган маълумотлар ёш боланинг онгига мос равишда, содда усул билан болалар тилида ҳикоя қилинади.

Боламизнинг тарбияси мукаммал бўлишига эришиш мақсадида унга ёшлигидан бошлаб ҳар соҳадан шингил-шингил маълумотлар бериб боришимиз жуда фойдалидир. Болани ҳар бир нарса ва воқеадан ибрат олишга, тўғри хулоса чиқаришга ўргатишимиз зарур. Бу ўринда тарихий мисолларга мурожаат қилишнинг аҳамияти катта. Ушбу китобчанинг услуби мана шу йўналишдадир. Унда оламнинг яралиши ҳақида қисқача тушунча берилади. Аллоҳ, дин, пайғамбарлар ва ҳоказо бошқа мавзулар навбат билан бирма-бир зикр қилинади. Дарс давомида керакли хулосалар чиқариб борилади. Булар боланинг ёшлик чоғида билиб олиши зарур бўлган бирламчи маълумотлардир. Зеро, бу билимлар боланинг

руҳиятига таъсир қилади, уни покиза ҳаёт кечиришга ўргатади.

Кўпинча боланинг одобсиз ёки безори бўлиб қолиши, ота-онасининг гапига қулоқ солмай ўсиши, ўсмир бўла туриб ҳам ибодатга астойдил киришиб кетолмаслиги унга Аллоҳ, фаришталар, дин, пайғамбарлар, Қиёмат, жаннат, дўзах ва ҳисоб-китоб ҳақида унинг ёшига мос равишда тушунтирилмаганидан ҳам келиб чиқади. Агар бола билан бу мавзуларда чиройли ва мунтазам суҳбатлар ўтказиб турилса, унинг хулқи одобида, илм ва ибодатга қизиқишида албатта ижобий ўзгаришлар пайдо бўлади, иншоаллоҳ.

Ота-оналар ва устозлар ҳар куни ёки кун ора бу китобдан биттадан дарсни боланинг ўзига овозини чиқартириб ўқитадилар. Зарур бўлса, ўзлари ўқиб берадилар. Кейин ундаги мавзунини эҳтиёжга қараб кенгайтириб тушунтирадилар. Ундан сўнг боладан тушунган нарсасини гапириб беришни сўрайдилар. Ҳар бир дарс сўнгида берилган қоидани ўқувчининг қобилиятига қараб, ёд олишни тавсия этадилар. Ўтилган дарсни мустақил ўқиб тайёрлашни топширадилар. Эртаси куни боладан кечаги дарс ва унинг сўнггидаги қоидани сўрайдилар.

Рисолада иймон ва Ислом рукнлари баён қилинмаган. Улар алоҳида китобларнинг мавзусидир. Ушбу китобшанинг вазифаси - болага Ислом дини ҳақида бирламчи тушунча беришдан иборат.

Рисолани тайёрлашда мўътамад манбалардан, жумладан, Имом Исбаҳонийнинг «Сифатул-жанна» ва Имом Байҳақийнинг «Исботу азобил-қабр» китобларидан фойдаланилди.

## Бисмиллаҳир Роҳманир Роҳийм

### 1 БУ ДУНЁНИ КИМ ЯРАТГАН?..

Ассалому алайкум, ҳурматли болалар! Биз сизлар билан бу китобчада ҳар бир мусулмон бола ва мусулмон қизча билиши керак бўлган Ислом дарсларини ўрганамиз. Қадимда бўлган воқеалар ҳақида суҳбатлар қиламиз. Улардан ибрат оламиз. Дарсларимиз давомида эътиқод ва одобимиз чиройли бўлиб боради.

Болалар, келинлар, биз аввало бу дунёни ким яратган, деган саволга жавоб топайлик. Шунда одамлар қандай пайдо бўлганини ҳам билиб оламиз. Бунинг учун сизлар атроф-табиатга бир қаранглар-чи. Нималарни кўраяпсизлар? Дарахтлар, ўсимликлар, ер, осмон, қуёш ва ҳоказо. Тўғрими? Қани, энди айтинлар-чи, мана шу нарсаларни ким яратган?..

– АЛЛОҲ ТАОЛО!

– Тўша-тўғри! Буларнинг ҳаммасини Аллоҳ Таоло яратган. Сиз билан бизни ҳам У пайдо қилган. Аммо Аллоҳ бу дунёни, одамларни қандай қилиб яратган, биласизларми? Мана, эшитинлар бўлмаса.

Илгари осмон ҳам, ер ҳам, одамлар ҳам бўлмаган эди. Дарахтлар, ўсимликлар, ҳайвонлар ҳам йўқ эди. Ёлғиз Аллоҳнинг Ўзи бор эди, холос. Аллоҳ бу дунёни яратишни

хоҳлади. Шунда У энг аввал Аршни, кейин Қаламни яратди. Нурдан фаришталарни пайдо қилди. Кейин сувни, сўнг ер билан осмонни яратди. Ундан кейин йерда денгиз-океанларни, тоғлар ва дарёларни, ҳамда ўсимликлар ва ҳайвонларни пайдо қилди. Оловдан Иблисни яратди. (Иблис-Шайтон). Аллоҳ ҳамма нарсани яратиб бўлгандан сўнг ОДАМ отамизни яратди. У Одам отамизни лойдан яратиб жон киргизди. Кейин Ҳавво онамизни пайдо қилди.

Аллоҳ Одам Ато ва Момо Ҳаввони жаннатга киритиб қўйди. Жаннат жуда ҳам катта ва чиройли жой эди. Одам Ато билан Момо Ҳавво жаннатда сайр-томоша қилиб, роҳат-фароғатда яшай бошладилар. Аллоҳ уларга: «Бу ерда хоҳлаган ерингиздаги неъматлардан бемалол йеяверинглар», - деди. Кейин жаннатдаги битта дарахтни кўрсатиб: «Мана бу дарахтга яқинлашманглар! » – деди. У дарахтнинг мевасини йеишдан қайтарди. Аммо бир куни Иблис Одам Ато ва Момо Ҳаввони алдаб, ўша дарахтнинг мевасидан йедириб қўйди. Чунки Шайтон уларга душман эди. Одам отамиз ва Ҳавво онамиз Шайтоннинг сўзига кириб, Аллоҳга гуноҳкор бўлиб қолдилар. Шундан кейин Аллоҳ уларни жаннатдан чиқариб юборди. Фаришталар Одам Ато ва Момо Ҳаввони Аллоҳнинг буйруғи билан ерга олиб келдилар. Одам ва Ҳавво ўзларининг қилган гуноҳларига йиғлаб тавба қилишди. Аллоҳ уларга меҳрибон эди. Уларнинг гуноҳларини кечирди. Тавбаларини қабул қилди.

Аллоҳ ерга Одам отамиз ва Ҳавво онамиз билан бирга Шайтонни ҳам юборди. Аммо энди Одам Ато ва Момо Ҳавво Шайтоннинг сўзига кирмасдан Аллоҳнинг айтганини қилиб ҳаёт кечира бошлашди. Аллоҳга чиройли ибодатлар қилиб юришди. Аллоҳ у икковларига кўпгина ўғил-қизлар берди. Одам Атонинг исмлари Одам бўлгани учун у кишининг болаларини, «Одам болалари», деб аталди. Кейин эса болаларни оталарининг номи билан «одамлар», деб айтила бошланди. Шундай қилиб бизнинг ҳам номимиз «одам» бўлди.

1 – қоида. Бу дунёни ва унинг ичидаги ҳамма нарсани Аллоҳ Таоло яратган. Бизни ҳам У яратган. Бу дунёдаги ҳамма нарса Уники.

### Саволлар:

1. Бу дунёни ким яратган? Қандай қилиб?
2. Одамлар қандай қилиб ерга келиб қолдилар?



## 2 АЛЛОҲ ТАОЛО КИМ?

АЛЛОҲ ТАОЛО бизнинг Раббимиздир. РАББ яратувчи, тарбия қилувчи, эга, дегани. Аллоҳ бутун оламни яратган. У ҳамма нарсани парвариш қилади, боқади, ўстиради. У оламнинг эгасидир. Аллоҳни ҳеч ким яратмаган. Унинг Ўзи аввалдан бор эди. Биз Аллоҳни Унинг исмлари, сифатлари орқали таниймиз ва Унга иймон келтирамиз. Унинг 99 та исм ва сифати бор.

Аллоҳ яккадир. Унинг ҳеч бир шериги, ёрдамчиси йўқ. У ёрдамчига ҳам, бошқа нарсаларга ҳам муҳтож эмас. У ҳеч кимдан туғилмаган. Ўзи ҳам ҳеч кимни туғмаган. Унинг ота-онаси, аёли, ўғли, қизи йўқ. Унга тенг келадиган ҳеч ким йўқ. У ҳеч нарсага ўхшамайди.

Аллоҳ - доимо тирик. У ҳеч қачон ўлмайди ва ухламайди. Ундан бошқа ҳамма нарса ўлади. Аллоҳ нимани хоҳласа тирилтиради, нимани хоҳласа ўлдиради. Одамлар, жинлар, ҳайвонлар, қушлар, балиқлар, ҳашаротлар Аллоҳнинг махлуқотларидир. Махлуқот яратилган нарсалар, дегани. Махлуқотлар бор бўлиш учун Аллоҳга муҳтож бўладилар. Уларга Аллоҳ жисм, жон, ҳаво, сув ва овқат беради.

Аллоҳ - одамларга меҳрибон. У ердаги барча нарсани одамзодга хизмат қилсин, деб яратган. У шамол ва булутларни юборади. Ёмғир-қорларни ёғдиради. Океан-денгизларни сув билан тўлғизади. Дарёларни оқизади. Дарахтларни ўстиради. Одамларга нон бўлсин, деб

буғдойларни йетиштиради. Яна У меваларни пиширади. Гулларни очилтиради. Бизга овқат бўлиши учун ҳалол ҳайвонларни яратади. Ердан фойдали конларни чиқариб беради. Касалларга шифо беради. Биз Уни яхши кўрамыз.

Аллоҳ ҳаммадан кучли. Ер, осмон ва уларнинг ўртасидаги ҳамма нарсалар Аллоҳга бўйсунди. Қуёш, ой ва юлдузлар Аллоҳ кўрсатган йўлдан четга чиқмайдилар. Бир-бирлари билан тўқнашиб кетмайдилар. Баъзан тепамизда момақалди роқ гумбуралиди. Чақмоқ чақади. Осмондан олов келиб ерга урилади. Дарахтлар, уйлар ёниб кетади. Баъзан қаттиқ ер қимирлайди. Иморатлар йиқилади. Одамлар уйларнинг тагида қолиб кетадилар. Баъзи ерларга сел келиб, ҳамма нарсани сув оқизиб кетади. Буларнинг ҳаммасини ким қилади?.. Аллоҳ! Биз Аллоҳдан кўрқамиз.

Аллоҳ ҳамма нарсани эшитувчи, кўрувчи, билувчидир. Аллоҳ ернинг устида, остида ва осмонда бўлаётган ишларнинг ҳаммасини кўриб, билиб туради. Шивирлаб гаплашилган гапларни ҳам эшитади. Қоп-қоронғида турган нарсаларни ҳам, ҳеч кимнинг кўзига кўринмайдиган зарраларни ҳам кўради. У одамларнинг дилларидан ўтган фикрларини ҳам билиб туради.

Аллоҳдан бошқа биронта худо йўқ. Худо, деб унга ибодат қилинадиган Зотни айтилади. Ибодат, деганда намоз ўқиш, рўза тутиш каби ишлар тушунилади. Одамлар Аллоҳни танишлари, Ундан кўрқишлари, Унга ибодат қилишлари керак. Гуноҳ ишлардан тўхташлари шарт. Шунда Аллоҳ уларни балолардан асрайди. Агар

одамлар Аллоҳнинг айтганини қилмасалар, У офат юборади. Ёмонларни ҳалок қилади. Баъзан ёмонларга қўшиб яхшиларга ҳам бало юборади. Шунинг учун яхши одамлар ўзларидан бошқаларни ҳам Аллоҳнинг йўлига чақирадилар, ёмон йўлдан қайтарадилар.

2 – қоида. Аллоҳ - ҳаммамизнинг Раббимиз. Дунёдаги ҳамма ишларни У бошқаради. Аллоҳ яккаю ягонадир. Ундан бошқа ҳеч бир худо йўқ. Биз Аллоҳга ишонамиз ва ибодат қиламиз.

Саволлар:

1. Аллоҳ қандай зот?
2. Аллоҳни нима учун танишимиз керак?

### 3 ДИН НИМА ДЕГАНИ?

Болалар, энди бу дарсимизда «Дин нима?» деган саволга жавоб берамиз.

Одам Ато ва Момо Ҳавво жаннатдан чиқарилиб, ерда ҳаёт кечира бошладилар. Аммо улар ҳали кўп нарсаларни билмас эдилар. Ер юзида нима ишларни қилиш фойдали? Нималарни қилиш зарарли? Қайси ишни қилса савобу қайси ишни қилса гуноҳ бўлади? Буни уларга кимдир ўргатиши керак эди. Шунинг учун Аллоҳ Таоло ерга ЖАБРОИЛ, деган фариштани юборди. Аллоҳ ушбу фариштага фойдали насиҳатларни бериб, буларни Одам Атога ўргатишни буюрди. Жаброил алайҳиссалом етти қават осмоннинг устидан учи-и-б, ерга тушиб келдилар. Аллоҳ берган илм ва насиҳатларни Одам Атога ўргатдилар ва шуларга амал қилишни буюрдилар. Одам отамиз Аллоҳдан олган илмларга Момо Ҳавво билан бирга амал қилдилар. Бу илмларни ўз болаларига ҳам ўргатдилар.

Аллоҳ осмондан юборган хабар, илм, буйруқ ва насиҳатларни ДИН, деб аталади. Динга қандай амал қилишни пайғамбар кўрсатиб беради. Ақлли кишилар албатта динга кирадилар. Аллоҳга иймон келтириб, Унга ибодат қиладилар. ИБОДАТ Аллоҳга бандалик, қуллик қилиш, дегани. Намоз ўқиш, рўза тутиш, дуо қилиш, Аллоҳ учун қурбонлик қилиш, Қуръон тиловат қилиш, илм ўқиш, одамларни Аллоҳнинг йўлига чақириш ибодатдир. Инсон ибодат қилганда ўзини йўқдан бор

қилган Аллоҳга ташаккур билдирган, Унинг мукофотларидан умид қилган бўлади. Банда ибодат қилаётган вақтда Аллоҳни яхши кўрган ҳолда Унинг дунё ва Охиратдаги азобидан кўрқиб туриши керак.

Динга кирган одамни МЎМИН, МУСУЛМОН, деб айтилади. Мўмин-мусулмонлар Аллоҳга ибодат қилиш билан бирга ҳамма одамга яхшилик қиладилар. Қийналганларга ёрдам берадилар. Мўминларнинг уйларида нур, барака бўлади. Аллоҳ уларни бало-офатлардан сақлайди. Қиёматда эса жаннатга киритади.

Ёмон одамлар динга киришга унамайдилар. Аллоҳнинг динига кирмаган одамни КОФИР, деб айтилади. Баъзи одамлар Аллоҳдан бошқа нарсаларга ибодат қиладилар. Аллоҳдан бошқага ибодат қилишни ШИРК, дейилади. Ширк ишини қиладиган одамни МУШРИК, деб айтилади. Мушриклар ўз қўллари билан ясаб олган ёлғон худоларга ибодат қиладилар. Улар шайтоннинг йўлига кириб кетадилар. Кофир ва мушриклар дунёда гуноҳ ишларни қиладилар. Ҳаром нарсаларни йейдилар. Бундай одамлар ўзларининг ёмонликлари сабабли ҳар хил касалликларга дучор бўладилар. Уруш, ер қимирлаш, сув тошқини каби балоларга учрайдилар. Охиратда эса дўзах оловига улоқтириладилар.

Баъзи одамлар Аллоҳ юбормаган ва пайғамбар айтмаган ишларни динга киритиб, мана шу ҳам диндан, деб айтадилар. Диндан бўлмаган бундай ишларни БИДЪАТ, дейилади. Бидъатни Аллоҳ ҳам, пайғамбар ҳам,

мусулмонлар ҳам ёмон кўришади. Бидъат ишни Аллоҳ қабул қилмайди.

3 – қоида. Аллоҳ Таоло осмондан юборган насихат ва буйруқларни дин, деб аталади. Одамлар ўйлаб топган ёлғон динни эса ширк, дейилади. Дин одамлар учун жуда ҳам фойдалидир. Ширк одамларга фақат зарар келтиради.

Саволлар:

1. Дин нима дегани? Ибодат, деб нимага айтилади? Аллоҳ нима учун динни юборди?
2. Мўмин ва мусулмон, деб кимга айтилади? Кофир, мушрик, ширк, бидъат нима дегани?

## 4 ПАЙҒАМБАР КИМ?

Биз яхши биламизки, Аллоҳ одамларга тўғри йўлни кўрсатиш учун уларга дин юборган. Бунинг учун Аллоҳ одамларнинг ичларидан энг ақлли ва энг яхши кишини танлаб олган. Кейин унинг олдига Жаброил фариштани юборган. Жаброил алайҳиссалом у одамга Аллоҳ юборган хабарни олиб келган. Жаброил фаришта Аллоҳдан унга хабар олиб келадиган инсонни ПАЙҒАМБАР, деб аталади. Аллоҳ пайғамбарга осмондан юборадиган хабарни ВАҲЙ, деб аталади.

Аллоҳ баъзи пайғамбарга фақат ўзи амал қилиши учун ваҳй, дин юборган. Бундай пайғамбарни НАБИЙ, дейилади. Аллоҳ баъзи пайғамбарга ўзидан бошқа одамларни ҳам динга давъат қилишни буюрган. Бундай пайғамбарни РАСУЛ, дейилади. Расул элчи дегани.

Расуллар ўз замонларидаги инсонларга: «Мен сизларга Аллоҳ томонидан элчи қилиб юборилдим», - деганлар. Сўнг уларни Аллоҳга иймон келтиришга ва Унга ибодат қилишга чақирганлар. Аммо кўп одамлар бу гапга ишонишмаган. Шунда Аллоҳ Таоло пайғамбарларга турли мўъжизалар берган. Мўъжиза одамларнинг қўлидан келмайдиган қийин ишларни қилиш, дегани. Пайғамбарлар мўъжизалар кўрсатиб, ўзларининг Аллоҳ томонидан юборилган ҳақиқий элчилар эканликларини исботлашган. Шундан кейин кўпгина одамлар уларга ишонишган ва иймон келтиришган. Ўликларни

тирилтириш, осмондан ноз-неъматлар тушириш, дарахтлар ва ҳайвонлар билан гаплашиш каби ишларни мўъжиза, деб аталади.

Одам Ато энг яхши инсон бўлганлари учун Аллоҳ у кишини ердаги энг биринчи набий-пайғамбар қилди. У киши Аллоҳ юборган динга Момо Ҳавво билан бирга амал қилдилар. Динни болаларига ўргатдилар.

Одам отамиз вафот этганларидан кейин у кишининг фарзандлари жуда кўпайиб кетишди. Улар ер юзининг ҳар хил тарафларига тарқаб кетиб ҳаёт кечира бошладилар. Одамлар турли-туман халқларга бўлиниб кетдилар. Аллоҳ ҳар бир қавм ва халқнинг ишидан унинг ўзига алоҳида пайғамбарлар чиқарди. Қадимда Нух, Ҳуд, Солиҳ, Иброҳим, Лут, Мусо, Исо каби пайғамбарлар одамларни динга даъват қилиб ўтишди. Айтишларича, қадимда ўтган набий ва расулларнинг сонлари бир юз йигирма тўрт минг бўлган. Аллоҳ у пайғамбарларга ҳам Жаброил фаришта орқали ваҳй юбориб, ваъз-насиҳатлар қилди. Динларини янгилаб турди. Баъзи пайғамбарларга осмондан насиҳатлар ёзилган саҳифалар туширди. Баъзиларига муқаддас китоблар юборди. Одамлар расулларга бўйсуниб яшаган пайтларида жуда ҳам яхши ва ширин ҳаёт кечирдилар. Пайғамбарга итоат қилмаганларни Аллоҳ офатлар юбориб ҳалок қилди.

Пайғамбарлар дунёдаги энг одобли ва энг раҳмдил кишилардир. Улар одамларга фақат яхшилик қилишади. Ҳеш кимдан пул, мол-дунё сўрамасдан Аллоҳнинг динини ўргатишади. Шунинг учун пайғамбарлар Аллоҳ энг яхши



кўрадиган инсонлар бўладилар. Кимки пайғамбарнинг айтганини қилса, Аллоҳ ўша одамни ҳам яхши кўради.

4 – қоида. Пайғамбар бу дунёдаги энг раҳмдил, энг илмли ва энг ақлли инсондир. Одамларнинг ишидан фақат пайғамбарга Аллоҳдан ваҳй келади. Ҳамма одамлар: олимлар, подшоҳлар ва барча халқлар пайғамбарга бўйсунушлари керак.

Саволлар:

1. Пайғамбар, набий, расул ҳақида гапириб беринг.
2. Нима учун одамлар пайғамбарга бўйсунушлари керак?

## 5 ШАЙТОН НИМА УЧУН ЯРАТИЛГАН?

Болалар, биз биринчи дарсда ўқидикки, Аллоҳ одамларни яратмасдан олдин фаришталар билан бирга ИБЛИСни ҳам яратган. Иблис жин ва шайтонларнинг отаси бўлади. Аллоҳ Иблисни оловдан яратган. Иблис (Шайтон) - жуда ёмон махлуқ. У Аллоҳнинг айтганини қилмайди. Ҳеч кимга бўйсунмайди. Фақат ёмон ишларни қилади. Яхши одамларни ёмон кўради.

Аллоҳ Одам отамизни яратгандан сўнг фаришталарга: «Одамга сажда қилинглари!» – деб буюрди. Ҳамма фаришталар дарҳол Одам алайҳиссаломга ҳурмат саждасини бажо қилдилар. Ўшанда Иблис ҳам фаришталарнинг орасида эди. Бироқ у Одам Атога сажда қилмади. Аллоҳ ундан сен нима учун Одамга сажда қилмадинг, деб сўраганда у: «Мен Одамдан кўра яхшироқман-ку», – деди. Яна у: «Мени оловдан яратгансан, уни эса лойдан!» – деб Аллоҳга гап қайтарди. Иблис Аллоҳнинг айтганини қилмагани учун кофир бўлди. Шундан кейин Аллоҳ уни Ўзининг ҳузуридан ҳайдаб юборди. Унга лаънатлар айтди. Ана шу вақтдан бошлаб Иблис Одам отамизга душман бўлиб қолди. Иблиснинг ҳам болалари бўлади. Унинг болаларини шайтонлар, дейилади. Шайтон ва унинг болалари бу дунёда одамлар билан бирга яшайди. Чунки Шайтон Аллоҳдан бу дунёнинг охири бўлгунча яшаб юришга рухсат сўради. Аллоҳ: «Майли, сен маълум вақтгача одамлар орасида

яшаб тур», деб айтди. Шунда Шайтон: «Мен энди доим одамларни тўғри йўлдан адаштиришга ҳаракат қиламан», деди. Аллоҳ: «Менинг яхши бандаларимни адаштиришга сенинг кучинг йетмайди!» - деб айтди. У яна Иблисга: «Мен жаҳаннамни сен ва сенга эргашиганлар билан тўлғизаман!» - деди.

Энди Шайтон ўз болалари билан то Қиёмат куни келгунича ҳар хил ёмон ишларни, зарарли ўйинларни одамларга чиройли кўрсатиб, уларни алдаб юради. Инсонларни ҳаром ишларни қилишга қизиқтиради. Аллоҳнинг динидан қайтаради. Уларни бир-бирлари билан уруштиради. Ёмон одамлар шайтоннинг айтганини қиладилар. Шайтон мусулмонларни ҳам бир-бирларига ёмон кўрсатишга, уруштиришга ҳаракат қиладди. Сизлар бир-бири билан урушаётган болаларни кўрганмисизлар? Ана ўша болаларни шайтон уруштираётган бўлади. Ўша болалар дарров бир-бирлари билан ярашиб олишлари керак.

Аллоҳ нега шайтонларни яратган? Бунинг сабаби шуки, Аллоҳ одамларни синаб кўради. Қани, улар Аллоҳнинг айтганини қиладиларми ёки шайтоннинг айтганини? Агар улар Аллоҳнинг айтганини қилсалар, Аллоҳ уларга ёрдам беради. Шайтоннинг йўлига юрсалар, Аллоҳ уларни шайтонларга ташлаб қўяди.

«Аувзу биллаҳ. . . » ва «Бисмиллаҳ. . . »ни кўпгина айтадиган, намоз, Қуръон ва дуоларни ўқиб юрадиган яхши болаларни алдашга шайтоннинг кучи йетмайди.

Аллоҳ одамларга насиҳат қилиб: «Шайтоннинг алдовларига эргашиб кетманглар! У сизларга очиқ-ойдин душмандир», - деб айтган.

5 – қоида. Аллоҳ одамларни синаш учун шайтонларни яратган. Кимки Шайтоннинг йўлига кирса, у Шайтон билан бирга дўзахга тушади. Кимки Аллоҳнинг айтганини қилса, Аллоҳ уни шайтонлардан сақлайди.

Саволлар:

1. Шайтон ким? У нима учун кофир бўлган?
2. Аллоҳ шайтонларни яратмаса бўлмасмиди?

## 6 АЛЛОҲ КОФИРЛАРНИ ЖАЗОЛАЙДИ

Одам Атодан кейин одамлар анча вақтгача Аллоҳнинг айтганини қилиб яшадилар. Аммо орадан кўпгина йиллар ўтгандан сўнг баъзи кишилар шайтонларнинг сўзига кириб, Аллоҳни эсдан чиқара бошладилар. Диндан узоқлашдилар. Кейин бутунлай шайтонларга қўшилиб, кофир бўлиб кетдилар. Аллоҳ ундай одамларни тўғри йўлга чақириш учун яхши инсонлардан пайғамбарлар тайинлади. Ҳар хил замонларда, турли хил юртларда кўпгина пайғамбарлар яшадилар.

Ер юзида инсонларни ҳақ йўлга чақириш учун элчи қилиб юборилган энг биринши расул Нух пайғамбар бўлдилар. У киши одамларни Аллоҳга иймон келтиришга даъват қилдилар. Яхши одамлар Нух алайҳис-саломга итоат қилиб, у кишининг айтганларини бажардилар. Аллоҳнинг Ўзига ибодат қилдилар. Аммо уларнинг сонлари жуда ҳам оз эди. Кўпчилик одамлар кофирларга эргашиб кетиб, Нух пайғамбарнинг сўзларига кулоқ солмадилар. Кофирлар одамларни Аллоҳнинг динидан тўсиб, ёмон йўлларга чақиравердилар. Ўғирлик, босқинчилик қилавердилар. Бу ишларнинг ҳаммасини уларга шайтонлар ўргатиб турди.

Мушриклар одамларни алдар эдилар. Улар тошдан, ёғочдан ҳайкаллар ясаб, «Мана шу ҳайкаллар худо бўлади», деб айта бошладилар. Мушриклар Аллоҳга ибодат қилишнинг ўрнига ўзлари ясаган ҳайкалларга ибодат

қилардилар. Улар бошқа одамларни ҳам шу бутларга ибодат қилишга ўргатдилар. Ер юзида кофир-мушриклар ҳам, гуноҳ ишлар ҳам жуда ҳам кўпайиб кетди. Оз сонли яхши одамлардан бошқа ҳеч ким Нух пайғамбарнинг айтганларини қилмади. Шундан кейин пайғамбар: «Сизларга қаттиқ кун келиб, устларингизга азоб ёғилишидан қўрқаман», деб кофирларни огоҳлантирдилар. Бироқ, кофирлар бу сўзга ҳам эътибор бермадилар. «Биз сенинг худойингдан кучлимиз! » - деб пайғамбарни ва мўминларни масхара қилдилар. Шундан сўнг Аллоҳ кофир-мушрикларнинг устига тўфон балосини юборди. Узоқ вақт тўхтамасдан қаттиқ ёмғир ёғди. Дарё ва денгизлар тошиб кетди. Шаҳар-қишлоқлар сувнинг тагида қолди. Ёмон одамларнинг ҳаммаси сувга ғарқ бўлиб ўлди. Мусулмонлар Нух алайҳиссалом ясаган кемага чиқиб саломат қолдилар.

Худ пайғамбар замонларида ҳам кофирлар Аллоҳга ибодат қилишга унамадилар. Гуноҳ ишларда давом этавердилар. Шундан кейин қаттиқ шамол бўлиб, ҳамма кофирларни учириб кетди. Шамол ёмон одамларни тоғларга олиб бориб, тошларга уриб ҳалок қилди.

Лут пайғамбар замонларида кофирларнинг устига осмондан тошлар ёғди. Аллоҳга иймон келтирмаган ярамас одамлар ўлиб, йўқ бўлиб кетдилар.

Аммо Аллоҳнинг динида мустаҳкам турган мўмин-мусулмонлар ҳар сафар ҳам балолардан омон қолдилар. Аллоҳ Таолонинг Ўзи уларни сақлади. Аллоҳ иймонли одамларни кофирларнинг зулмидан ҳам қутқарди. Яхши

одамлар Аллоҳга ибодат қилиб, яна осойишта ҳаёт кечира бошладилар.

6 – қоида. Аллоҳ кофир ва мушрикларни ёмон кўради. Агар улар пайғамбарнинг насиҳатига қулоқ солмасалар, Аллоҳ балолар юбориб, уларни жазолайди. Мўминларни эса Ўзи сақлайди.

Саволлар:

1. Кофирлар пайғамбарларга нима деб айтишди?
2. Аллоҳ кофирларни қандай жазолади?

## 7 ЭНГ СҮНГГИ ПАЙҒАМБАР

Болалар, биз Аллоҳ одамларга жуда кўп пайғамбар юборганини билиб олдик. Бугун эса охирги пайғамбар ким эканини ўрганамиз. Аллоҳ бу дунёга охирги пайғамбарни қачон юборган, биласизларми?

Аллоҳ бундан 1400 йил олдин ер юзига энг сўнгги пайғамбарини юборди. У пайғамбар бизнинг пайғамбаримиз МУҲАММАД саллаллоҳу алайҳи ва салламдилар. Аввалги пайғамбарлар ўзларининг қавмларига элчи қилиб юборилар эдилар. Муҳаммад саллаллоҳу алайҳи ва саллам бутун оламга пайғамбар бўлиб келдилар. Илгариги пайғамбарлар маълум вақтга пайғамбар бўлиб келардилар. Аллоҳ Таоло Муҳаммад саллаллоҳу алайҳи ва салламини бу дунё тамом бўлгунча яшайдиган ҳамма одамларга, барча халқларга, ҳатто жинларга ҳам пайғамбар қилди.

У кишининг исмлари Муҳаммад. Оталарининг исми Абдуллоҳ. Оналарининг исми Омина. Боболарининг оти Абдулмутталиб. Пайғамбаримиз Қурайш қабиласидан, Ҳошим уруғидан, Иброҳим пайғамбар авлодларидан бўладилар. Пайғамбаримизнинг отларини эшитганда «Саллаллоҳу алайҳи ва саллам», дейилади.

Муҳаммад саллаллоҳу алайҳи ва саллам Фил йилида (570 - йил) Макка шаҳрида туғилдилар. Оталари у киши туғилмасларидан аввал вафот этганлар. Пайғамбаримиз 6 ёш бўлганларида оналари ҳам вафот этдилар. Муҳаммад



саллаллоҳу алайҳи ва саллам ёшликларидан йетим бўлиб ўсдилар. Аммо у киши жуда ҳам одобли бола эдилар. Болалик пайтларида ҳам бошқа болаларга ўхшаган ўйинқароқ эмасдилар. Сахрога чиқиб одамларнинг қўйини боқиб берардилар. Катталарга ёрдамлашиб юрардилар. У кишини ҳамма яхши кўрарди.

40 ёшга йетганларида Аллоҳ Муҳаммад саллаллоҳу алайҳи ва салламга пайғамбарлик берди. Жаброил фаришта келиб пайғамбаримизга ИСЛОМ динини ўргатдилар. Аллоҳдан ҚУРЪОН номли китобни олиб кела бошладилар.

Аллоҳ Муҳаммад саллаллоҳу алайҳи ва салламни РАСУЛУЛЛОҲ (Аллоҳнинг элчиси), деб атади. Аллоҳ у кишига аввал ўз яқинларини Исломга чақиришни буюрди. Кейин Қурайш қабиласини, ундан сўнг ҳамма одамларни Исломга даъват қилиш кераклигини айтди. Расулulloҳ одамларни иймонга чақиришга бошладилар. Аввалига озгина одам мусулмон бўлди. Кўп кишилар Расулulloҳга қарши чиқдилар. Мушриклар у зотни масхаралаб, ҳақоратлар қилдилар. Мусулмон бўлганларни азобладилар, баъзиларини ўлдирдилар. Шундан сўнг мўминлар Пайғамбаримиз билан Маккадан Мадина шаҳрига кўчиб кетдилар. Расулulloҳ яна сабр билан барча одамларни Исломга даъват қилавердилар. Мусулмонлар борган сайин кўпайиб бордилар. Кофирлар бундан аччиқланиб, мусулмонларга қарши уруш бошладилар. Пайғамбаримиз ва мусулмонлар Аллоҳ йўлида жиҳод қилишди. Аллоҳ уларга ёрдам берди. Мусулмонлар

кофирлар устидан ғалаба қозондилар. Ниҳоят, араблар ва жуда кўп халқлар Ислом динига киришди. Муҳаммад саллаллоҳу алайҳи ва саллам 23 йил пайғамбарлик қилдилар. Аллоҳ буюрган вазифани чиройли қилиб бажардилар. Расуллуллоҳ 63 ёшларида Мадина шаҳрида вафот этдилар. Аллоҳ у кишига, оила аъзоларига ва саҳобаларига салавот ва салом ёғдирсин!

7 – қоида. Муҳаммад саллаллоҳу алайҳи ва саллам энг охириги пайғамбардирлар. У киши бутун дунё халқига пайғамбар бўлиб келганлар. Муҳаммад саллаллоҳу алайҳи ва салламдан кейин ҳеч ким пайғамбар бўлмайди.

Саволлар:

1. Аллоҳ бу дунёга яна пайғамбар юборадими?
2. Расуллуллоҳ одамларни Исломга қандай қилиб давъат қилдилар?

## 8 КИМГА ЎХШАГАН БЎЛИШНИ ХОҲЛАЙСИЗ?

Одатда болалар кимгадир ўхшагилари келади. Ҳар бир бола ўзича қаҳрамон бўлсам, дейди. Уларнинг гапига кулоқ солган одам мана бундай сўзларни эшитади: «Мен фалончига ўхшаган зўр каратечи бўламан!» «Мен Имом Бухорийга ўхшаган олим бўламан!» «Мен Мишпорийга ўхшаб Қуръонни чиройли ўқийдиган машҳур қори бўламан!» Ана шунақа. Ҳар ким ўзининг яхши кўрган одамига ўхшагиси келади.

Биронта одам: «Сизлар кимга ўхшаган бўлишни хоҳлайсизлар?» - деб сўраса, нима деб жавоб берасизлар? Тўхтанглар, аслида кимни энг кўп яхши кўришимиз керак? Дунёда энг яхши одам ким ўзи? Бу оламда ҳамма томонлама кучли одам борми? Битта инсон бир вақтнинг ўзида ҳам паҳлавон, ҳам олим, ҳам жуда ақлли, ҳам энг одобли, ҳам энг чиройли бўла оладими? Мана шунақа одамни биласизларми? Билмасангизлар, мана энди билиб оласизлар.

Бу дунёда ҳамма жиҳатдан мукамал, ҳамма ҳавас қиладиган инсон Ҳазрат Муҳаммад соллаллоҳу алайҳи ва саллам бўладилар. У кишининг иймонлари ҳамманикидан кучли бўлган. Пайғамбаримиз Аллоҳдан бошқа ҳеч кимдан қўрқмаганлар. Агар жангга тушсалар, душманларнинг ҳаммасини йенгиб қўярдилар. Золимлар узоқ мамлакатларда туриб ҳам Расулудлоҳдан қўрқаверар эдилар. Пайғамбаримиз ҳаммадан илми бўлганлар.

Келажакда нима ишлар бўлишини ҳам Аллоҳнинг ёрдами билан оддиндан айтиб берганлар. У киши Қуръоннинг ҳаммасини ёддан билганлар. Қуръонни Расулulloҳдек чиройли ва кўп ўқийдиган ҳеч ким бўлмаган. Расулulloҳ жуда ҳам одобли, ширин тил, камтар, ҳаёли, уятчан ва роса ҳам чиройли инсон эдилар. Пайғамбаримизни бир марта кўрган одам яна бир кўрсам, деб юрарди. Бир марта сўзларини эшитган инсон яна бир бор суҳбатлашсам-ку, деб орзу қилиб қоларди. Расулulloҳ камбағаллар ва мазлумларга меҳрибон, йетимларни яхши кўрадиган, ҳаммага очиқ чеҳра билан муомала қиладиган, жуда ҳам саҳий одам эдилар. У киши ана шундай яхши инсон бўлганлари учун ҳам Исломи дини ҳаммага ёқиб қолди. Мусулмонлар кўпайиб кетишди. Эҳе... Муҳаммад саллаллоҳу алайҳи ва салламнинг сифатларини айтиб адоғига йетказиб бўлмайди. Шунинг учун яхши болалар ҳамма ишда у кишига ўхшаган бўлишга ҳаракат қиладилар.

Пайғамбаримизни кўрган одамни ким дейилади? Пайғамбаримизни кўриб, у кишига иймон келтирган кишини САҲОБА, дейилади. Саҳобалар пайғамбаримизни жуда яхши кўришган. У кишига ўхшаган инсон бўлишга ҳаракат қилишган. У кишининг қилган ишларини қилиб, айтган сўзларини бажаришган. Расулulloҳнинг қилган ишларига СУННАТ, деб айтилади. Айтган сўзларини, қилган насиҳатларини ҲАДИС, дейилади. Биз Расулulloҳни иншоаллоҳ, жаннатда албатта кўрамиз. Бунинг учун ҳозирдан бошлаб у кишининг айтганларини бажаришимиз керак.

Айтгандай, қизлар кимга ўхшаган бўлишлари керак? Қизлар Расулulloҳнинг қизлари ва аёлларига ўхшаган одобли, илмли, қўрқмас бўлишлари керак.

8 – қоида. Биз ҳаммадан кўпроқ Расулulloҳни яхши кўрамыз. У кишига ўхшаган бўлишни хоҳлаймиз. Пайғамбаримизнинг бизга қолдирган Қуръон ва Суннатларини ўрганиб, унга амал қиламиз.

Саволлар:

1. Сиз кимни яхши кўрасиз? Нима учун Пайғамбаримизга ўхшаган бўлишни хоҳлайсиз?
2. Пайғамбаримизнинг сифатларидан гапириб беринг.

## 9 ЭНГ УЛУҒ КИТОБ

Болалар, дунёдаги энг улуғ китоб қайси китоб?

— ҚУРЪОНИ КАРИМ!

Тўппа-тўғри! Бу жавобни ким айтган бўлса ҳам унга катта раҳмат! Бу дунёда Қуръонга тенг келадиган мукаммал китоб йўқ. Чунки Қуръон Аллоҳнинг сўзи. Бу оламда Аллоҳга тенг келадиган ҳеч ким йўқ-ку. Демак, Унинг китобига тенг келадиган китоб ҳам бўлмайди. Қуръонни Аллоҳ Таоло етти қават осмоннинг устидан Муҳаммад саллаллоҳу алайҳи ва салламга туширган. Бу китобни энг улуғ фаришта Жаброил алайҳиссалом олиб келганлар. Аллоҳ Қуръонда ер юзида яшайдиган ҳамма инсонларга насиҳат қилади.

Қуръон - Аллоҳнинг мўъжизаси. Ҳеч ким бу китобга ўхшаган китоб ёза олмайди. Қуръон одамлар ёзган китобларга ўхшамайди.

Қуръонда нималарни айтилган? Қуръонда қадимда ўтган пайғамбарлар ва уларнинг қавмлари ҳақида қизиқарли ҳикоялар бор. Иброҳим пайғамбар ёш бола бўла туриб қандай қилиб бутларни синдирганлар? У киши оловдан қандай қилиб соғ чиққанлар? Нима учун Мусо пайғамбарни чақалоқлик вақтларида сандиқчага солиб, дарёга оқизиб юборишган? Фиръавн, деган кофир подшо нима учун ёш болаларни сўйдирган? Кейин Аллоҳ унинг ўзини қандай қилиб дарёга чўктириб ўлдирган? Аллоҳ

мўминларни кофирларнинг зулмидан қандай қутқарган? Ҳайвонлар, қушлар ҳам ибодат қилишадими? Улар қандай гапиришади? Ўликлар қандай қилиб тирилади? Қуръонда мана шулар ҳақида ажойиб суралар бор.

Қуръон ОЯТ ва СУРАлардан ташкил топган. Бир ёки бир неча сўздан тузилган жумлани оят, деб аталади. Бир неча оятлар қўшилиб, сура бўлади. Қуръонда 114 та сура бор. 6 мингдан кўп оят бор.

Одамлар Аллоҳга қандай ибодат қилишлари керак? Дунёда қандай яшашлари лозим? Ота-онага қандай яхшилик қилинади? Қўшнилари, қариндошлар ва бошқа одамлар билан қандай муомала қилинади? Мусулмон подшоҳлар халққа қандай йўл кўрсатиши керак? Давлатни қандай бошқариш лозим? Мусулмонларга душман бўлаётганларга нима жавоб қилиш керак? Буларнинг ҳаммасига Қуръонда жавоб бор. Ҳа, Қуръон жуда кўп илмларни, маъноларни ўз ичига олади. Уни ким кўп ўқиса, ўшанча кўп илми бўлади. Мусулмонлар Қуръонни ўқиб ундаги қоидаларга амал қилишади. Шунда улар бу дунёда ҳеч адашмайдилар. Аллоҳ: «Бу Қуръон энг тўғри йўлга бошлайди» - деган. Расулulloҳ соллаллоҳу алайҳи ва саллам: «Сизларнинг яхшиларингиз Қуръон ўрганган ва уни ўргатган кишилардир», - деб айтганлар.

Қуръонга иймон келтирган инсонларга Аллоҳ бу дунёда бахтли ҳаёт беради. Охиратда уларни жаннатга киритади. Қуръонга ишонмаган, амал қилмаган одамларга бу дунёда ҳам, Охиратда ҳам азоб бўлади.

Қуръон тиловат қилинганда осмондан савоб ва нур ёғилади. Қуръон ўқилган уйда фаришталар бўлади. Қуръон касалларга шифодир. У қалбларга хурсандлик олиб киради. Қуръонни чиройли ўқиган болаларни Аллоҳ ҳам, фаришталар ҳам суйиб эшитиб туришади.

9 – қоида. Қуръон - Аллоҳнинг муқаддас сўзи. Унда Аллоҳ дунёдаги ҳамма одамларга хитоб қилган. Қуръонда ҳамма нарсага жавоб бор. Қуръон Қиёмат куни келгунича ўқилади ва амал қилинади.

Саволлар:

1. Қуръон қаердан келган, у қандай китоб?
2. Қуръонда нималар бор, уни нима учун ўқилади?



## 10 ИСЛОМ ҚАНДАЙ ДИН?

«Аллоҳнинг наздида ҳақиқий дин Исломдир». Бу сўзни ким айтган, биласизларми? Буни Қуръонда Аллоҳ айтган. Шундан биламизки, ИСЛОМ бу дунёдаги энг тўғри диндир. Аллоҳ дунёдаги ҳамма одамларни Исломга киришга ва уни ўрганишга буюрган.

Исломга кириш учун нима қилиш керак? Исломга кириш учун энг аввал Аллоҳ ва Расулulloҳга иймон келтириш лозим. Иймон келтирганда чин дилдан: «Ла илаҳа иллаллоҳу Муҳаммадур расулulloҳ», деб айтилади. Бунинг маъноси: «Аллоҳдан бошқа худо йўқ, Муҳаммад Унинг элчисидир», дегани бўлади. Ислом динига кирган одамни МУСУЛМОН, дейилади.

Исломни бизга Аллоҳдан Муҳаммад саллаллоҳу алайҳи ва саллам олиб келганлар. Аввалдаги пайғамбарларга юборилган дин ҳам Ислом бўлган. Аммо Муҳаммад саллаллоҳу алайҳи ва саллам туғилган пайтларида Ислом одамларнинг эсидан чиқиб кетган эди. Кўпчилик кишилар тош ва ёғочдан ясалган бутларга ибодат қилишар эди. Шундан кейин Аллоҳ Муҳаммад саллаллоҳу алайҳи ва саллам орқали бу дунёга янгидан Ислом динини юборди. Исломнинг қоидаларини Қуръонда тушунтириб берди. Баъзи қоидаларни эса Пайғамбаримиз ўзларининг ҳадисларида айтиб бердилар. Ҳадисларни ҳам Расулulloҳнинг қалбларига Аллоҳнинг Ўзи солиб қўйган.

Пайғамбаримиз ўзлари араб миллатидан бўлганлар. Бироқ, Ислом фақат араблар учун келган эмас. Исломга кирган одам қайси халқдан бўлса ҳам мусулмон бўлаверади. Ўзбеклар ҳам, қозоқлар ҳам, қирғиз ва тожиклар ҳам, хатто ўрислар ҳам Исломга кирсалар, бир хилда мусулмон бўладилар. Аллоҳ: «Мўминлар бир-бирлари билан ака-укадирлар», - деган. Мусулмонлар қайси тилда гаплашсалар ҳам бир-бирлари билан биродар бўладилар. Расулulloҳ соллаллоҳу алайҳи ва саллам: «Ҳаммангиз Одам зурриётидансиз. Одам эса тупроқдан яратилган», - деганлар. Шунинг учун Исломга кирган одамлар ўзларини бир-бирларидан устун қўймайдилар. Улар доимо иноқ ва дўст бўлиб ҳаёт кечирадилар.

Исломда яхши ишлар қилишни САВОБ, ёмон ишлар қилишни ГУНОҲ, дейилади. Савоб иш қилган одамни Аллоҳ яхши кўради. Унга катта-катта мукофотлар беради. Гуноҳ қилган одамни Аллоҳ ёмон кўради ва агар тавба қилмаса, уни азоблайди.

Аллоҳ ва Пайғамбаримиз: «қилманглар!» деган ишлар ҲАРОМ ишлардир. Одам ўлдириш, ўғирлик қилиш, қимор ўйнаш, уят иш қилиш, ароқ ичиш, жанжаллашиш, урушиш, бир-бирини хафа қилиш – ҳаром! Чўчқа, ит, эшак каби ҳайвонларнинг гўштини йеиш ҳам ҳаромдир. Ҳаром ишларни қилиш - гуноҳ!

Ислом бўйсунуш, деган маънони билдиради. Исломга кирган одам Аллоҳга ва Унинг расулига сўзсиз бўйсунди. Ислом 5 та нарса устига қурилган: Иймон келтириш, намоз ўқиш, рўза тутиш, закот бериш, ҳаж қилиш.

Буларни ФАРЗ, дейилади. Фарз деб Аллоҳ буюрган ишларга айтилади. Фарзларни бажариб юрган кишилар Аллоҳдан савоб-мукофот оладилар. Бажармаганлар гуноҳкор бўладилар.

10 – қоида. Ислom энг тўғри диндир. Ислom Аллоҳга ибодат қилишга, ота-онани розилигини олишга, катталарни ҳурмат қилишга, кишикларга меҳрибон бўлишга буюради. Муслмонлар бир-бирлари билан ака-ука ва иноқ бўлиб яшайдилар.

Саволлар:

1. Ислom нима дегани? У қандай дин?
2. Фарз, савоб, гуноҳ, ҳаром нима дегани? Буларга мисоллар келтиринг.

## 11 АЛЛОҲ – МУСУЛМОНЛАРНИНГ ДЎСТИ

Аллоҳ бу дунёни яхши одамлар учун яратган. Одамларни эса Аллоҳга ибодат қилиб, яхши ишларни бажаришлари учун пайдо қилган. Аллоҳ: «Мен жин ва инсонларни фақат Менга ибодат қилишлари учун яратдим», - деган. Яхши одамлар бу дунёда Аллоҳга иймон келтириб, мусулмон бўладилар. Илм оладилар, намоз ва Қуръон ўқийдилар. Меҳнат қиладилар. Ҳаммага яхшилик қилиб юрадилар. Ана шунда ер юзи обод бўлади. Шаҳар ва қишлоқлар гуллаб-яшнайд. Шунинг учун Аллоҳ мусулмонларни яхши кўради.

Аллоҳ мусулмонларнинг дўстидир. У мусулмонларга доимо яхшилик қилади. Дуо қилсалар, дуоларини қабул қилади. Ёрдам сўрасалар, ёрдам беради. «Бизни зolimлардан қутқар!» – деб ҳаракат қилсалар, қутқаради. Касал бўлиб қолиб, шифо сўрасалар, шифо юборади. Вафот этсалар, жаннатга олиб киради.

Мусулмонлар қийин аҳволга тушиб қолсалар, сабр қиладилар. Аллоҳдан яхши кунларни сўраб меҳнат қиладилар. Улар: «Бу қийинчиликларга Аллоҳ учун сабр қиламиз, яхши кунлар келиши учун Аллоҳ айтганидек ҳаракат қиламиз», – дейдилар. Шунда Аллоҳ уларга савоб ёзиб қўяди ва яхши кунларни беради.

Агар мусулмонлар яхшиликка йетишсалар, Аллоҳга шукр қиладилар. «Бу яхшиликларни бизга Аллоҳ берди», дейдилар. Буни эшитиб Аллоҳ уларга яна савоб ёздириб

қўяди. Қаранг, мусулмон бўлиш қандай яхши-а! Кофирларга эса бунақа яхшиликлар йўқ. Чунки улар Аллоҳга иймон келтирмайдилар. Аллоҳ ҳам уларга савоб ёзмайди. Аллоҳ кофирларга яхши нарсаларни берса, улар: «Буни ўзимиз топдик, биз зўрмиз-да! », – деб ўзларини ўзлари мақтайдилар. Аллоҳни эсламайдилар. Бирон балога учраб қолсалар, ўзларининг ёмонликларидан эмас, бировлардан кўрадилар.

Аллоҳ бу дунёда Ўзининг дўстлари - мусулмонларни синаб кўради. Уларга баъзида офатлар юборади. Баъзида уларнинг устларига Ўзининг душманлари – кофирларни юборади. Мана шуларга қарши курашинглар, ўзингизни ва Аллоҳнинг динини ҳимоя қилинглар! – деб айтади. У: «Агар Аллоҳга ёрдам берсангизлар, Аллоҳ ҳам сизларга ёрдам беради!..» – деган. Мусулмонлар ўзларининг дўстлари бўлган Аллоҳга, яъни, Унинг динига ёрдам берадилар. Чунки инсон ўзининг дўстига ёрдам бериши керак-да, тўғрими?! Ана шундан кейин Аллоҳ ҳам мусулмонларга ёрдам беради. Уларни душманлар устидан ғолиб қилиб қўяди. Уларга катта-катта савоблар ёзади ва охирида мукофотлар беради.

Аллоҳ Ўзининг дўстларини ҳамма томонлама кучли бўлишларини хоҳлайди. Мусулмонлар энг аввал иймонда, илмда ва одобу ахлоқда кучли бўлишлари керак. Кейин бошқа ишларда ҳам кучли бўлишлари лозим. Шунда улар Аллоҳнинг динига ёрдам бера оладилар. Ана шунда Аллоҳ ҳам уларга энг биринчи ўринда ёрдам беради. Кучсиз мусулмонларга эса кейин ёрдам беради.

11 – Қоида. Аллоҳ - мусулмонларнинг дўсти. У кучли мусулмонларни кўпроқ яхши кўради. Мусулмон болалар ҳамма томонлама кучли бўлишлари керак. Улар энг биринчи илм олишга қаттиқ киришадилар. Ўқиганларига амал қиладилар.

Саволлар:

1. Аллоҳ мусулмонларга қандай яхшиликлар қилади? Уларни қандай қилиб синайди?
2. Аллоҳ нима учун кучли мусулмонларни кўпроқ яхши кўради?

## 12 ИККИ ФАРИШТА

Биз яхши биламизки, Аллоҳ фаришталарни нурдан яратган. Фаришталар (малоикалар) эркак ҳам эмаслар, аёл ҳам эмаслар. Улар овқат йемайдилар, сув ичмайдилар. Бола-чақалари ҳам йўқ. Малоикалар фақат Аллоҳнинг буйруқларини бажаришади. Улар ҳеч қачон гуноҳ ва ёмон иш қилишмайди. Доимо Аллоҳни улуғлаб, мақтаб туришади. Унга ибодатлар қилишади. Яна бошқа ҳар хил вазифаларни адо этишади. Уларнинг баъзилари бизнинг атрофимизни ўраб, кўриқлаб туришади. Аллоҳнинг буйруғи билан бизни балолардан, зарарлардан сақлаб юрадилар. Шайтонлардан ҳимоя қиладилар. Қилаётган ишларимизни кузатиб борадилар. Улар ҳар куни осмондан ерга навбат билан келиб кетишади. Кундузи учун алоҳида, кечаси учун алоҳида фаришталар бўлади. Кундузи тушган фаришталар кечкурун яна осмонга чиқиб кетадилар. Кечаси учун келган фаришталар тонг отганда осмонга кўтарилиб кетадилар. Улар яхши мусулмонларнинг ҳақиқа дуо қилиб туришади. Биз уларни яхши кўрамыз.

Фаришталар бизнинг кўзимизга кўринмайдилар. Аммо улар бизни кўриб туришади. Шунинг учун биз уларнинг олдиларида одобли бўлиб юришимиз керак.

Фаришталарнинг ишида ҳурматли котиб фаришталар борлар. Котиб фаришталар нима иш қиладилар, биласизларми? Улар ҳар бир одамнинг икки томонида турадилар. Ўнг томонда турадиган фаришта у одамнинг

яхши амалларини ёзиб боради. Чап томондаги фаришта эса ёмон амалларни ёзиб боради. Биронта кичкина иш ҳам уларнинг назарларидан четда қолмайди. Биронта сўз ҳам уларнинг дафтаридан тушиб қолмайди. Бизнинг ҳар бир ҳаракатимизни, ҳар битта сўзимизни бу икки фаришта ёзиб олади. Шунинг учун биз жуда ҳам эҳтиёт бўлишимиз керак. Ҳеч қачон гуноҳ ишларни қилмаслигимиз, ёмон ва уят сўзларни гапирмаслигимиз лозим.

Биз қаерга бормайлик, икки ёзувчи фаришта биз билан бирга боришади. У ерда нима иш қилсак ҳам ёзиб олишади. Ҳеч ким эшитмайдиган қилиб шивирлаб гапирсак ҳам улар эшитишади ва дафтарларига ёзишади. Аммо кимки гуноҳ иш қилгандан кейин тавба қилса, фаришталар унинг гуноҳини ўчирадилар.

Фаришталар бу дунёда ёзиб олган нарсалар Қиёмат кунида ошкор бўлади. Одамлардан бекитиб қилинган ишлар ҳам очилиб кетади. Фаришталарнинг ёзганлари инсоннинг ё зарарига ё фойдасига гувоҳ бўлади. Шунинг учун одамлар билиб қолса уят бўладиган ишларни одамлар йўқ ерда ҳам қилмаслик керак.

Кимки бу икки фаришта ҳақида эшитмасидан олдин бирор гуноҳ иш қилиб қўйган бўлса, дарров тавба қилиб олсин. «Эй Аллоҳ, менинг гуноҳимни кечир, билмай қилдим, энди бундай ишни қилмайман», деб айтсин. Кимки бирон ёмон сўзни гапириб қўйган бўлса, тезда «Астағфируллоҳ», деб истиғфор айтсин. Аллоҳ албатта кечиради. Тавба қилгандан кейин ундай ёмон ишни иккинчи бор қилмаслик керак.



12 – қоида. Малоикалар одамларни кўриб турадилар. Ҳар бир инсоннинг икки томонида икки котиб фаришта бўлади. Улар инсоннинг ҳамма сўзи ва ишини ёзиб боришади. Яхши мусулмонлар фаришталардан уяладилар. Ёмон сўзларни гапирмайдилар, гуноҳ ишларни қилмайдилар.

Саволлар:

1. Фаришталар қандай мавжудотлар? Икки котиб фаришта ҳақида гапириб беринг.
2. Билмасдан гуноҳ иш қилиб қўйган одам нима қилиши керак?

### 13 ҚАБРДАГИ ҲАЁТ

Одам боласи бу дунёда абадий яшамайди. Ҳамма инсон бир кун вафот этади. Баъзилар узоқ йил яшайди. Баъзилар ўртача умр кўради. Баъзилар ёшлигида вафот бўлиб кетади.

Инсон ўлгандан сўнг унинг жонини фаришталар олиб кетадилар. Агар у яхши одам бўлган бўлса, унинг жонини жаннат фаришталари олиб кетадилар. Ёмон одам бўлган бўлса, унинг жонини дўзах фаришталари олиб кетадилар. Инсоннинг жони танадан чиққандан кейин ё роҳатда ёки азобда яшайди.

Вафот этган кишининг жасадини одамлар ювиб, кафанга ўраб, қабристонга олиб борадилар. У жойда ўликни ерга кўмадилар. Одам кўмиладиган ерни қабр, дейилади. Инсон қабрга кўмилгандан кейин у ерда якка ўзи қолади. Ҳамма ўз уйига, ишига қайтиб кетади. Шундан сўнг Аллоҳ ўлган одамни қабрда қайта тириктиради. Нима учун?.. Чунки Аллоҳ ҳар бир инсонни қабрда сўроқ қилади. Аллоҳ қабрга Ўзининг икки фариштасини юборади. Уларнинг отини МУНКАР ва НАКИР, деб аталади. Мункар ва Накир қабрга кириб ўликни ўтқизадилар. Кейин уни сўроқ қила бошлайдилар.

Фаришталар «Раббинг ким?» – деб сўрайдилар. Яна улар: «Пайғамбаринг ким?» «Дининг нима?» – деб сўрашади. Агар инсон дунёда Аллоҳга иймон келтирган ва Унинг айтганларини қилиб яшаган бўлса, ҳеч

қийналмайди. Аллоҳ унинг тилига тўғри жавобларни келтириб қўяди. У одам фаришталарнинг саволларига тутилмасдан тўпша-тўғри жавоб беради. «Раббим – Аллоҳ!» «Пайғамбарим – Муҳаммад алайҳисалом», «Диним – Ислом», – деб айтади. Шунда қабр кенгайиб кетади ва гулу райҳонларга тўлади. Фаришталар қабрдаги кишига дўзах билан жаннатни кўрсатишади. Улар: «Қарагин, сенинг дўзахда ўрнинг бор эди. Аллоҳ уни жаннатга алмаштирди, энди роҳат қилиб ухлагин», деб чиқиб кетадилар.

Аммо ўлган одам бу дунёда динга амал қилмаган бўлса, у Мункар ва Накирнинг битта ҳам саволига жавоб бера олмайди. У жуда ҳам қаттиқ қўрқиб кетади. Фаришталар ёмон одамларнинг кўзига жуда ҳам хунук бўлиб кўринишади. Фаришталарнинг ранглари қоп-қора ёки кўм-кўк бўлиб қолади. Овозлари ҳам қаттиқ ва қўрқинчли бўлади. Кофир ва мунофиқ одам фаришталарнинг саволларига: «Билмайман», деб жавоб беради. Ёки қўрқиб: «А. . ! А. . ! » деб тураверади. Шундан кейин қабрга азоб фариштаси келади. У қўлидаги оғир темир гурзи билан у ердаги одамнинг бошига уради. У одам дод – фарёд қилади. Аммо унинг додлаганини ҳеч ким эшитмайди. Фаришта уни азоблайверади. Ёмон одам то Қиёмат куни бўлгунича ана шундай азобда ётади.

Кофир, мунофиқ ва ярамас одамлар қабрда бу дунёда қилган ёмон ишларига яраша ҳар хил азобда бўладилар. Бу ҳақда сизларга устозларингиз гапириб беришади. Яхши кишилар қабрда роҳатда ётадилар. Аллоҳ ҳаммамизни қабр азобидан асрасин.

13 – Қоида. Қабрда икки фаришта ҳар битта одамни сўроқ қилишади. Аллоҳ у ерда мўмин инсонга ёрдам беради. Кофир – мунофиқларга ва гуноҳкор мусулмонларга азоб беради. Қабр жаннатдан бир боғча ёки дўзахдан бир чуқурликдир.

Саволлар:

1. Мункар ва Накир қабрда нима деб савол беришади?
2. Мўминлар ва кофир-мунофиқларнинг қабрдаги ҳолатлари ҳақида гапириб беринг.

## 14 ҚИЁМАТ ҚАНДАЙ КУН?

Бу дунё аввалда йўқ эди. У бир кун яна йўқ бўлиб кетади. Ўша кун дунёнинг охири куни бўлади. Шунинг учун уни «ОХИРАТ» куни, дейилади. Унинг яна бир оти - «ҚИЁМАТ». Аллоҳ: «Қиёмат соати яқин келиб қолди», деб айтган. Аммо Қиёматнинг қачон бўлишини Аллоҳдан бошқа ҳеч ким билмайди.

Нима учун Қиёмат бўлади? Чунки Аллоҳ яхши инсон бўлиб яшаганларга Қиёматда мукофот бераман, ёмонлик қилганларни жазолайман, деган. У ана ўша ваъдасини бажариш учун Қиёматни келтиради.

Кунлардан бир куни қуёш кун ботиш томондан чиқиб келади. Ана шунда Қиёмат бошланади: Исрофил деган фаришта Сур чалади. Дунёда тирик жон борки, ҳаммаси Сурнинг овозини эшитиши биланок ўлади. Кейин Исрофил фаришта Сурни яна бир марта чалади. Шунда дунёнинг аввалидан бошлаб, то Қиёматгача яшаб ўтган жамики одамлар, жинлар ва ҳайвонлар қайтадан тирадилар. Баданлари йўқ бўлиб кетганларга Аллоҳ янгидан тана яратади. Фаришталар ҳамма инсонларни битта ерга тўплайдилар.

Қиёмат куни осмон қарсиллаб ёрилиб, юлдузлар тўкилиб кетади. Тоғлар гумбирлаб портлайди ва майда-майда бўлиб, ҳавода учиб юради. Қуёш кўқдан пастга туширилиб, ерга яқин қилиб қўйилади. Иссиқдан дарё ва денгиздаги сувлар қайнайди. Қиёмат жуда қийин кун

бўлади. У кунда ёш болалар ҳам қаттиқ кўрқиб кетадилар. Уларга ота-оналари ҳам қарамай қўядилар. Ҳамма ўзининг жонини ўйлаб қолади. Аммо болалик чоғидан бошлаб Раббига ибодат қилганларга Аллоҳ ёрдам қилади ва Аршнинг остидан соя беради.

Фаришталар бу дунёда ёзиб юрган амал китоблари Қиёмат куни ҳавода учиб келади. Жаннати одамнинг китоби ўнг ёки олд томонидан, дўзахи одамнинг китоби чап ёки орқа томондан учиб келади. Амал китобида инсоннинг ҳаётда қилган ҳамма ишлари ёзилган бўлади. Аллоҳнинг Ўзи ҳаммани сўроқ қилади.

Охираат кунида одамларнинг савоб ва гуноҳлари тарозуга солиб тортилади. Тарозунинг бир палласига савоб, иккинчи палласига гуноҳ қўйилади. Баъзи одамнинг савоби оғир келади. . . Баъзи одамнинг гуноҳи оғир келади. . . Кимнингдир ҳеч ҳам савоби бўлмайди. . .

Қиёмат куни ҳамма одамлар Сирот кўпригидан ўтказилади. Сирот кўприги - қилдан ингишка, қиличдан ўткир. У дўзахнинг устидан ўтади. Кофирлар, мунофиқлар ва гуноҳкор мусулмонлар Сиротдан ўтолмай дўзахга йиқиладилар. Яхши мусулмонлар Сиротдан эсон-омон ўтиб жаннатга қараб юрадилар. Кейин одамлар бир-бирларида қолиб кетган ҳақларини оладилар. Бу дунёда кимнинг бошқа бировда ҳақи қолган бўлса, унга ўша одамнинг савобидан олиб берилади.

Қиёматда одамлар қаттиқ чанқаб кетадилар. Бир қултум ҳам сув топилмайди. Шунда Расулуллоҳ Исломга чиройли

амал қилиб ўтган инсонларга КАВСАР деган каттакон кўлдан сув ичирадилар. Кавсардан бир марта сув ичган одам қайтиб асло чанқамайди.

Қиёматда яна жуда кўп ишлар бўлади. Улар ҳақида сизларга устозларингиз батафсил гапириб беришади.

14 - қоида. Қиёмат албатта келади. У куни кофирлар, мунофиқлар, золимлар, ярамас одамлар дўзахга ташланадилар. Ҳисоб-китобдан яхши ўтган мусулмонлар жаннатга киритиладилар.

Саволлар:

1. Нима учун Қиёмат бўлади?
2. Қиёмат кунида бўладиган ҳодисалар ҳақида гапириб беринг.

## 15 ДЎЗАХ – ЭНГ ЁМОН ЖОЙ!

Дўзах! . . Аллоҳ сақласин бизни у жойдан! Дўзах жуда ҳам ёмон жой! Унинг бир неча оти бор: Жаҳаннам, Жахийм, Сақар, Нор ва ҳоказо. Дўзах ҳозир ҳам бор. Уни Қиёмат куни ҳар битта одам ўз кўзи билан кўради.

Ярамас одамлар Қиёмат куни қоронғи зулмат, даҳшат ва азоб ичида хор бўлиб қолиб кетадилар. Улар: «Бизга раҳм қилинглар», деб ялиниб, ҳаммадан ёрдам сўрайдилар. Уларга ҳеч ким ёрдам бермайди. «Энди ҳолимиз нима бўлади?. . » - деб кўрқиб, йиғлаб турган пайтларида ҳамма ёқни тўс-тўполон, қий-чув ва кўрқинчли овозлар босиб кетади. Одамлар қарасалар, жаҳаннамни олиб келинаётган бўлади. Бу ҳақда Пайғамбаримиз саллаллоҳу алайҳи ва саллам бундай деганлар: «Қиёмат куни дўзахни олиб келинади. Унинг етмиш мингта жилови бўлади. Ҳар битта жиловидан етмиш мингтадан фаришта ушлаб судраб, уни олиб келади».

Дўзах жуда ҳам улкан бўлиб, у 7 қаватдан иборат. Унинг 7 та дарвозаси бор. Айтишлариша, дўзах 7 қават ернинг остидадир. Энг ёмон жойи унинг энг пастки қавати бўлади. У ерга мунофиқлар тушади. Жаҳаннам шунақа чуқурки, агар катта бир тошни ташланса, у жаҳаннамнинг тагига етмиш йил деганда йетиб боради.

Қиёмат куни жаҳаннам роса ҳам аччиқланган ҳолда бўлади. У ўзининг ичига ёмон одамлар тушишини билади. Шунинг учун уларни ютиб ёндиришга, азоблашга



шайланиб, ғазабланиб келади. Дўзахдаги оловнинг қаттиқ ёнаётганидан ундан қарсиллаган, тарақлаган, гумбирлаган овозлар чиқиб туради. Кейин гуноҳкорларни дўзахга ташлаш бошланади. Фаришталар ёмон одамларнинг номини айтиб: «Фалонши ўғли фалонши қани?!» - деб биттама-битта чақирадилар. Кофир, мунофиқ ва фосиқларни тутиб, уларнинг қўлларини гарданларига, оёқларини бошларига қилиб боғлайдилар. Бўйинларига занжирлар соладилар. Сўнг темирлар билан уриб, жаҳаннамга судраб борадилар ва оловга улоқтирадилар. Золим кимсага: «Сен дунёда ўзингни ҳаммадан зўр, ақли, энг кучли санаб юрар эдинг, мана, энди азобингни торт!» - деб айтадилар.

Дўзахга тушган одамларнинг устларида ҳам олов, остларида ҳам олов, ўнгу сўл томонларида ҳам фақат олов! Бўйинларида лахча чўққа айланган оғир занжирлар. Уларнинг овқатлари ҳам, ичимликлари ҳам олов бўлади. Яна уларга эритилган мисдан кийим кийгазилади. Бу азобни яна ҳам кучайтиради.

Дўзах олови билан бу дунёнинг олови орасида қандай фарқ бор? Пайғамбар саллаллоху алайҳи ва саллам айтганлар: «...Сизларнинг бу оловингиз жаҳаннам оловининг етмишдан бир қисмидир». Демак, жаҳаннамнинг олови жуда ҳам қаттиқ ва кучли бўлади.

Аллоҳ Қуръонда биз бу дунёдаги оловни дўзахни эслатиб турадиган қилдик, деган. Қадимда баъзи тақводор кишилар оловни кўрсалар, дўзах эсларига тушиб,

ранглари оқариб кетар эди. Қуръондаги дўзах ҳақидаги оятлар ўқилса, қўрқиб йиғлар эдилар.

Дўзахдаги кишилар оловда ёниб туриб ҳам яна бошқа азоблар билан азобланидилар. Жаҳаннам фаришталари уларнинг юзлари ва баданларига темирлар билан урадилар. Дўзахиларнинг суяклари синиб, майдаланиб кетади, гўштлири титилиб, осилиб ётади. Ичларидан, оғизларидан қон-йиринглар оқади. Қўл-оёқлари боғлаб қўйилгани учун оловда юзлари, бошлари билан думалаб юрадилар. Юзлари кўмирдек қорайиб қолади. Терилари куйиб тушиб кетади. Аммо унинг ўрнига яна янги терилар пайдо бўлади. Яна азоб, яна олов. Улар оловда ёниб, «сув-сув», деб ялинадилар. Шунда уларнинг устларидан қайноқ сув қуйилади. Оғизларидан ҳам қайноқ сув қуйилади. Улар бу дунёда айбсиз одамларни қийнаган, ўлдирган, ҳар хил гуноҳларни қилган, Аллоҳдан қўрқмаган бераҳм кишилар бўлишгани учун шундай азобланишади.

Дўзахнинг остидан юқорига қараб ўсиб чиққан каттакон тош бўлади. Фаришталар кофир одамнинг юзини ана шу тошга ишқаб, пастдан юқорига судраб чиқишади. Кейин уни темирлар билан уриб пастга қулатиб юборишади. Пастга йетиб тушгандан кейин уни яна юқорига қараб судрашади. . .

Жаҳаннамнинг каттакон аждаҳо илонлари, филдек келадиган улкан шаёнлари бўлади. Улар ҳам дунёда ҳаром ишларни қилган инсонларни чақиб, азоб беради. Баъзи кофирларни дўзахнинг ичида тор бир чуқурга тикиб қўйилади. Улар ҳеч бир қимирлай олмасдан азобланиб

ётадилар. Баъзи бир кишининг қорни ёрилиб, ичак-чавоқлари чиқиб кетади ва тошга ёпишиб қолади. Ўзи шу тошнинг атрофида айланиб туради. У бу дунёда одамларга яхши насиҳатларни қилган, аммо ўзи амал қилмаган одам бўлади. Шунинг учун биз ўқиган, билган нарсаларимизга албатта амал қилишимиз керак.

Юқорида айтилганлар дўзах азобларининг бир қисми, холос. Дўзахилар у азобларга чидамасдан: «Эй дўзах посбони, бизни бу ердан чиқариб юбор, энди ҳеч гуноҳ қилмаймиз», деб ёлворадилар. Аммо дўзах посбонлари уларга: «Баттар бўлинглар! Гапирманглар бизга! Агар сизлар бу ердан чиқсанглар, илгари қилган ишларингизни яна қиласизлар!» - деб айтишади. Дўзахилар дунёда қилган гуноҳларига минг-минг пушаймон бўладилар. Беҳуда ўтказган умрларига афсус чекадилар. Аммо афсуслари фойда бермайди. Охири улар ўлимни орзу қиладилар. «Қанийди, ўлсагу бу азоблардан қутулсак», - дейдилар. Аммо у ерда ўлим бўлмайди. Фақат азоб, азоб... Чунки улар дунёда жуда кўп ёмон ишларни қилишган-да.

Жаҳаннамдагиларга Зариъ деган овқат йедирилади. У тиконга ўхшаган бўлиб, томоққа ёпишиб қолади. На у ёққа юради на бу ёққа. Зариъ заҳардан аччиқ, ахлатдан ҳам сассиқ. Яна у ерда Заққум деган дарахт бўлади. У оловда ёнмайди. Олов теккан сайин катталашиб, ўсиб кетаверади. Унинг меваси ҳам дўзах аҳлининг овқатидир. Агар Заққум дарахти мевасининг бир томчиси бу дунёга тушса, дунёдаги ҳамма сувлар, овқатлар, мевалар ўша заҳоти сасиб кетади. Дўзахдагиларга яна Ғислийн деган

овқат ҳам берилади. У дўзахиларнинг баданларидан ва оғизларидан оқадиган қон, йиринглардан иборат.

Дўзахиларга ичириладиган ичимликлар 4 хилдир: Ҳамийм, Ғассоқ, Садийд, Муҳл. Ҳамийм бу - қайноқ сув. Дўзахда ундан қайноқ нарса бўлмайди. Ғассоқ - кофирнинг гўшти ва терисидан оқадиган йиринг. Садийд эса қон ва йирингдан иборат. Муҳл - қайнаб турган ёғ. Дўзахдаги кимсаларга ана шуларни ичиш буюрилади. Дўзахи одам Садийдни оғзига олиб борса, оғзи ва юзи куйиб тушади. Ичса, ичаклари узилиб-қирқилиб, орқасидан чиқиб кетади. Кимки бу дунёда ароқ ичадиган бўлса, Аллоҳ унга дўзах аҳлининг йиринглари ичиради. Аллоҳ бизни ҳамма гуноҳлардан ва азоблардан Ўзи асрасин.

Дўзахиларнинг кўринишлари ҳам даҳшатли ва қўрқинчли бўлади. Юзлари куйиб бужмайиб кетади. Юқори лаблари тортилиб бошларигача чиқиб қолади. Пастки лаблари осилиб, киндикларигача тушади. Тишлари панжарадек очилиб, иржайиб қолган бўлади. Баъзиларнинг кўриниши чўчқага ўхшаб қолади. Агар битта дўзахи одамни бу дунёга келтириб қўйилса, одамлар уни кўриб қўрқиб кетиб ва сассиғига чидолмай ўлиб қолардилар.

Болалар, дўзахга қандай одамлар тушади, эшитганмисизлар? Дўзахга тушадиганлар мана булардир:

1. Аллоҳ ва Расулга иймон келтирмаган кофирлар, ўзини ёлғондан мусулмон қилиб кўрсатиб, Исломга,

мусулмонларга зарар йетказиб юрган мунофиқлар, диннинг ривожига тўсқинлик қилган фосиқлар?

2. «мусулмонман», деб туриб, намоз ўқимаган, Аллоҳ ва Пайғамбарнинг айтганларини тўлиқ бажармаган ёки Исломга ўзгартириш киритган кишилар?

3. халққа зулм қилган подшоҳ ва амалдорлар, одамларни кўрқитган, ноҳақ пулларини олган, қийнаган, қамоққа солган хизматчилар?

4. одам ўлдирганлар, ўзини ҳаммадан афзал деб билган кибрли кишилар, мактанчоқ-риёкорлар, кўпол, баджаҳл одамлар, уят ишларни қилган ахлоқсизлар, ғийбатчи-чақимчилар, хасадгўйлар, фитначилар, алдамчилар, фолбинлар, ўғрилар, арақхўрлар, қиморбозлар, ҳаромдан пул топганлар, ота-онасини, қариндошларини, дўстларини норози қилганлар?

Дўзахга мусулмон киши ҳам тушадими? Дўзах аслида кофирлар учун яратилган. Бироқ, мусулмон одам ҳам агар бу дунёда гуноҳ қилса ва тавба қилмасдан ўлса, дўзахга киради. У гуноҳи борица жаҳаннамда куяди. Гуноҳлари тугагандан сўнг иймони туфайли дўзахдан чиқиб, жаннатга киради. Дўзахдаги мусулмонларнинг баъзиларини Аллоҳнинг рухсати билан Пайғамбаримиз шафоат қиладилар, яъни дўзахдан олиб чиқадилар. Ҳаётда савобли амалларни кўп қилган яхши мусулмонлар ҳам Аллоҳдан рухсат сўраб, ўзлари таниган баъзи мўминларни дўзахдан чиқариб оладилар. Агар инсон бу дунёда Аллоҳга иймон келтирмаган ва ибодатлар қилмаган бўлса, уни

дўзахдан ҳеч ким қутқариб қололмайди. Кофир ва мунофиқлар дўзахда абадий қолиб кетадилар.

Бир куни Пайғамбаримиз Қурайш қабиласини йиғиб, уларга дўзах ҳақида гапирдилар. Дўзахдан қутулиш учун ҳар ким ўзи ҳаракат қилиши керакли-гини айтдилар. Кейин ўзларининг қизларига қараб: «Эй, Муҳаммаднинг қизи, Фотима! » - дедилар, «Сен ҳам ўзингни ўзинг дўзахдан қутқаргин. Чунки мен сизларга Аллоҳнинг олдида ҳеч нима қилиб бера олмайман». Ана кўрдингларми?! Ҳатто Пайғамбар саллаллоҳу алайҳи ва саллам ҳам ўз қизларини агар Аллоҳнинг айтганини қилмаса, дўзахдан сақлаб қололмас эканлар. Демак, ҳар бир инсон дўзахга тушиб қолмаслик учун ўзи ҳаракат қилиб, Ислом динига тўлиқ амал қилиши керак. Кўнгли тоза, одобли ва хушмуо-мала бўлиши лозим. Тез-тез садақа қилиб туриши, Аллоҳга дуо қилиб, дўзахдан сақлашини сўраб юриши зарур.

15- қоида. Аллоҳ Ўзига итоат қилмаган бандалар учун жаҳаннамни яратган. У жуда ҳам ёмон жой. Кофирлар, мунофиқлар шубҳасиз, дўзахга тушадилар ва у ердан қайтиб чиқмайдилар. Гуноҳкор мусулмонлар ҳам дўзахга кирадилар. Улар гуноҳлари борича азобланиб, кейин дўзахдан чиқадиладар ва жаннатга кирадилар. Аллоҳ бизни гуноҳ ишлардан узоқ қилсин. Фақат яхши амаллар қилиб, жаннатга киришимизни насиб этсин. Омийн!

### Саволлар:

1. Қиёмат куни дўзахни қандай қилиб олиб келинади? Ярамас одамларни қандай қилиб дўзахга ташланади?
2. Жаҳаннам олови ҳақида нималарни биласиз? Жаҳаннамда яна қандай азоблар бўлади?
3. Дўзахиларнинг овқати ва ичимликлари нималардан иборат?
4. Дўзахга қанақа одамлар тушишини айтиб беринг.
5. Дўзахга тушиб қолмаслик учун нима қилиш керак?

## 16 ЖАННАТ ҚАНДАЙ ЖОЙ?

Эҳа! . . Жаннат! Жаннат! Болалар, биласизларми, жаннат қанақа жой? Агар мен ҳозир жаннат ҳақида гап бошласам, гапим ҳеч тугамайди. Аммо майли, келинглар, сизларга озгина гапириб берайин. Қолганини катта китобларни ўқиганда ўзинглар билиб оласизлар.

Сизларга тушунтириш учун жаннатни қайси боққа, қайси гўзал шаҳарга ўхшатсам экан-а?. . Йўқ, уни ҳеч нарсага ўхшатолмайман. Чунки бу дунёда жаннатга ўхшайдиган ҳеч бир жой йўқ-да! У шунақа ҳам широйлики, сўз билан таърифлаб бўлмайди. У ерга фақат бориб кўриш керак! Ана шунда биласиз, жаннатнинг қанақа эканлигини! «Жаннатда кўз кўрмаган, қулоқ эшитмаган, одамнинг ҳаёлидан ўтмаган нарсалар бор», - деганлар Пайғамбаримиз саллаллоҳу алайҳи ва саллам .

Жаннат ҳозир борми? Ҳа, жаннат ҳозир бор! У етти қават осмоннинг устида, Аллоҳ Аршининг остида. У ниҳоятда чиройли боғлардан, шарқираб оқаётган дарёлардан, ажойиб шаҳар ва мамлакатлардан, соя-салқин оромгоҳлардан иборат. Жаннатга кирган одам бу дунёни унутиб қўяй дейди. Ҳеч қайтиб чиққиси келмайди. Унинг катталиги кандоқ, айтайми? Етти қават осмон билан ернинг ҳаммаси қўшилса ҳам жаннатга тенг бўлолмайди. Жаннат ана шунақа катта! Унинг хушбўй ҳиди 100 йиллик йўлдан келиб туради. Жаннат қават-қават қилиб яратилган



бўлиб, унинг энг юқориси Фирдавс жаннати деб аталади. Бу дунё йўқ бўлиб кетади. Аммо жаннат ҳеч йўқ бўлмайди.

Жаннатнинг 8та дарвозаси бор. Улар шунақа каттаки, бу чети билан у четининг ораси 40 йиллик йўл. Жаннат дарвозасининг олдида биринчи бўлиб Муҳаммад саллаллоҳу алайҳи ва саллам келадилар. Жаннат у кишига очилади. Жаннатга энг аввал шу зот кирадилар. Кейин у кишининг умматлари - биз мусулмонлар кирамиз. Шундан сўнг бошқа пайғамбарларнинг умматлари киришади. Дин йўлида ҳалок бўлган шаҳидлар, илмига амал қилган олимлар, камбағалларни яхши кўрадиган бойлар ва сахийлар жаннатга биринчилар қаторида кирадилар. Жаннат аҳлининг энг кўпи камбағаллар ва кўп зулм тортган кишилар бўладилар. Ота-онасининг дуосини олган одамлар, эрини рози қилган аёллар, хушмуомала кишилар ҳам жаннатга тезроқ кирадилар.

Жаннатнинг 100 та даражаси бор. Инсонлар бу дунёда қанчалик чиройли ва кўп амал қилганларига қараб турли хил даражада жой оладилар.

Жаннатнинг ҳавоси жуда ҳам ёқимли. У совуқ ҳам эмас, иссиқ ҳам эмас. Доимо худди баҳордек бўлиб туради. Эрталаб кун чиқиш олдидан бўладиган наҳор вақти бор-ку, жаннатда ана ўшанақа тоза ва покиза ҳолат бўлади. У ерда қуёш бўлмайди. Аммо Аллоҳнинг нури билан ҳамма ёқ ёп-ёруғ бўлиб туради.

Жаннатнинг меваларига келсак, уларнинг неча минг хил эканини Аллоҳдан бошқа ҳеч ким билмайди. Улар ҳозир

ғарқ пишиб, жаннати одамларни кутиб турибди. Улар ҳеч қашон айнамайди, сасимайди. Тик туриб узаман десангиз ҳам, ўтирган ерингизда узаман десангиз ҳам, ёнбошлаб ётиб узаман десангиз ҳам жаннат мевалари сизнинг о-о-олдингизга келиб туради. Биттасини узсангиз, унинг ўрнига дарҳол иккита мева пайдо бўлиб қолаверади. Улар шунақа ҳам ширинки, мазаси оғзингиздан ҳеч ҳам кетмайди.

Агар гўшт йегингиз келиб қолса, олдингизга турли қушлар учиб келишади ва тилга кириб сизга ўзларини таништира бошлайдилар: «Мен фалон қушман, фалон нарсадан йеб катта бўлганман, гўштим роса ширин, мени йенг! » - дейди биттаси. «Мен фалон-фалон гулларни йеб ўсганман, менинг гўштим жудаям ширин, мени йенг! » - дейди бошқаси. Сиз қайси бирини танласангиз, у ўша заҳоти пишиб, тилла лаганда олдингизга келади. Йеб бўлишингиз билан у яна тирилиб учи-и-иб кетаверади.

Жаннатда битта одамга мингта хизматчи бўлади. Улар ҳар гал овқат олиб келишганда 70 хил тилло лаганда турли овқатлар, сон-саноксиз қадахларда ичимликлар келтиришади. Танлаган таомингиздан истаганингизча йеяверасиз. Хоҳлаган ичимлигингиздан мириқиб ичаверасиз. Қорнингиз тўлиб кетмайди. Овқатдан кейин ҳожат ушатиш, ёзилиш бўлмайди. Йеган овқатингиз йенгил терга айланиб, ўзи чиқиб кетаверади. Танангиздан чиққан тердан ажойиб атирнинг хиди келади. Жаннатда бурун қоқиш, туфлаш, йўталиш, шамоллаш, касал бўлиш йўқ. Аллоҳ у ерда ҳамма одамларга янгидан тана

пайдо қилиб беради. Баданингизда қон, йиринг, балғам бўлмайди. Нафас олиб, нафас чиқарганингизда оғзингиздан ўз-ўзидан ҳамд-сано ва тасбеҳ чиқаверади. Жаннатда ҳар бир инсонга овқат йеиш, ичиш ва бошқа ишлар учун 100 та одамнинг кучи бериб қўйилади. Бундай яхшиликлар бу дунёда ҳаром нарсалар йемаган, ҳаром ишларни қилмаган, Аллоҳу Расулнинг айтганларини қилиб ўтган, нафсини тийган инсонлар учун тайёрлаб қўйилган.

Жаннатга киришда кампирлар ёш қизларга айланадилар. Чоллар йигит бўладилар. Соқоллари бўлмайди. Жаннатда ҳамма одамлар бир хилда 33 ёшда бўладилар. Ҳеч ҳам қаримайдилар, ўлмайдилар. Доимо ёш ва чиройли бўлиб юравадилар. Жаннатда бир бозор бўлади. У ерда ҳеч нима сотилмайди. Аммо ҳар хил чиройли одамларнинг суратлари бўлади. Ўша ерга бориб, қайси сурат сизга ёқса, ўшани танлайсиз. Сиз ўша суратдаги чиройли одамга айланасиз. Шундай қилиб, ҳамма ўзи хоҳлаганша чиройли бўлиб қолади.

Жаннатда битта денгизда сув, битта денгизда сут, яна бир денгизда асал, бошқа денгизда бошқа ичимликлар бўлади. Ана ўша денгизлардан дарёлар оқиб ётади. Дарёлар уйларнинг остидан оқиб ўтади. Аммо ҳеч кимга зарар қилмайди. Одамлар уйларида туриб томоша қилиб ўтирадилар. У ерда яна бир дарё бор. У дарёнинг лабида чиройли қизлар бўлади. Улар жуда широйли овоз билан ашула айтишади. Одамлар келиб уларнинг ашулаларини эшитадилар. Бунақа овозни дунёда ҳали ҳеч ким

эшитмаган. Ўша қизлардан қайси бири кимга ёқиб қолса, Аллоҳ уни ўша одамга ҳадя қилади. Унинг ўрнига Аллоҳ ўша заҳоти яна бошқасини яратиб қўяди. Аллоҳ ҳар бир киши ушун хизмат қилсин, деб жаннатда 72 та қиз совға қилади. Уларнинг иккитаси бу дунёдаги қиз-аёллардан, 70 таси жаннат ҳурларидан бўлади. Жаннатда хотин-қизлар ҳам мўмин-мусулмонлардан ўзлари хоҳлаган кишилари билан бирга бўладилар. Уларга ҳам Аллоҳ жуда кўп яхшиликларни тайёрлаб қўйган.

Жаннатда бир дарахт бор. Агар унинг тагида от билан юз йил чопсангиз ҳам сояси тугамайди. Ҳа, айтгандай, жаннатда қанотли учар отлар бўлади. Унга минсангиз, сизни учури-и-иб кетади. Аммо йиқитиб юбормайди. Олиб қочиб кетмайди. Қаерга десангиз, «хўп» деб, олиб бориб, сизни томоша қилдириб юради.

Бу дунёда кам амал қилган, жаннатга ҳаммадан кейин кириб, энг оз мукофот оладиган одамни айтиб берайми? У одамга жаннатда бериладиган боғлар, гулзорлар, шаҳар ва мамлакатлар ҳозир биз яшаб турган дунё билан баробар бўлади. Кейин унга шу дунёдан яна 10 таси берилади. Ана кўрдингизми? Жаннатдаги энг оз мукофот шунақа бўлса, энди роса кўп амал қилган одамга бериладиган мукофотни қандай тасаввур қилиб бўлади?

Жаннатнинг шаҳар ва қўчалари, сарой ва қасрлари, ҳовли ва уйлари олтин-кумушдан, ёқут ва забаржаддан, марварид ва зумраддандир. Ерида чанг ва кирлар йўқ. Тупроғи ёқимли ҳид таратадиган заъфарондир.

Хуллас, одамларга нима ёқадиган бўлса, ҳаммаси жаннатда мухайё қилинган. Уларга нима ёқмайдиган бўлса, ҳаммасини дўзахга олиб кириб қўйилган.

Жаннатдаги энг катта неъмат ва мукофот шуки, ҳамма мўминлар Аллоҳни ўз кўзлари билан кўрадилар! У билан юзма-юз туриб саломлашадилар, гаплашадилар. Бу энг улуг бахтдир. Демак, биз жаннатда Аллоҳни ва Пайғамбаримизни кўрамиз. Аввалда ўтиб кетган мўмин ота-боболаримиз, момо-бувиларимизни ҳам иншоаллоҳ жаннатда топамиз. У ерда ҳар бир одам ўзининг яхши кўрган одамлари, дўстлари билан бирга яшайди. Аммо жаннатга йетиш ушун инсон бу дунёда ҳақ йўлда бўлиши, қийинчилик ва синовларга чиройли сабр қила олиши керак.

Эҳе! Гапираман десам, роса гап қўп. Аммо, вақт кам. Болалар, яхшиси ўзинглар тезроқ китоб ўқийдиган бўлинглар. Шунда яна кўпгина нарсаларни билиб оласизлар. Энг зарури сизлар жаннатга кирадиган яхши болалар ва яхши қизлар бўлинглар. Илмли, одобли, ибодатли, тақволи, меҳнатсевар, сабрли ва қўрқмас инсонлар бўлиб ўсинглар, хўпми?! Яшанглар!

16 - қоида. Биз яшаётган дунё Қиёмат куни йўқ бўлиб кетади. Шундан сўнг Аллоҳ мўминларни жаннатга киритади. Жаннат бу дунёда Аллоҳга иймон келтириб, ибодат қилган, покиза ҳаёт кечирган, сабрли, ғайратли ва жасур мусулмонлар учун тайёрлаб қўйилган. Мусулмонлар жаннатда абадий роҳатда яшайдилар.

### Саволлар:

1. Пайғамбаримиз жаннатни қандай таърифлаганлар? Жаннат ҳозир қаерда?
2. Жаннатга энг аввал кимлар киради?
3. Жаннат ҳақида нималарни биласиз?
4. Жаннатга кириш учун нима қилиш керак?

## 17 МУСУЛМОН БОЛА ҚАНДАЙ БЎЛАДИ?

Ҳурматли болалар! Биз сизлар билан кўп нарсаларни ўқиб-ўргандик. Билмаганларимизни билиб олдик. Энди бугун охириги дарсимизда яхши бола ва яхши қиз қанақа бўлиши кераклиги ҳақида суҳбат қиламиз. Мусулмон бола доим амал қилиб юрадиган қоидаларни бирма-бир санаб ўтамиз. Сизларга осон бўлиши учун бу қоидаларни уч қисмга бўлиб ўрганамиз.

### Биринчи қисм

1. Мусулмон бола Аллоҳга ва Расулulloҳга иймон келтирган бўлади. Ҳаммадан кўра кўпроқ у икковларини яхши кўради. Улар буюрган амалларни ихлос билан тўлиқ бажариб, савобини ҳар куни кўпайтириб боради. Ибодат вақти бўлганда ялқовлик қилмайди. Яхши ишларга буюрилганда бўйин товламайди. Аллоҳнинг дунё ва Охиратдаги азобидан қўрқиб туради. Гуноҳларига тавба қилади. Ислоҳ қайтарган ишларни ҳеч ҳам қилмайди. Аллоҳдан ўзини, ота-онасини, қариндошларини, устозлари ва биродарларини дўзахдан асрашини, жаннатга киритишини сўраб юради.

2. Мусулмон бола яхши боладир. У ота-онасини яхши кўради. Уларни доимо хурсанд қилишга ҳаракат қилади. Мабодо билмасдан хафа қилиб қўйса, дарров кечирим сўрайди. Иш буюрсалар, «Хўп бўлади!» деб бажаради.

Уларнинг дуоларини олади. Бирор иш қилаётган бўлсалар, қарашиб юборади. Ота-онанинг оддиларида одоб билан туради.

3. Мусулмон боланинг бадани ва юз-қўллари тоза, кийимлари озода бўлади. У тирноқларини, сочларини кўп ўстириб юбормайди. Хоналарни, ўзининг кўрпа-ёстиқларини покиза сақлайди. Йечган кийимларини чиройли қилиб тахлаб қўяди. Дастрўмолини ғижим қилиб юбормайди. Китоб-дафтарларини кир қилмайди. Уйдаги ишларни ўзи билиб-билиб қилаверади.

4. У ака-укалари, опа-сингилларини ҳурмат қилади. Қариндошларини кўриб келади. Чунки Аллоҳ қариндошлар билан яхши алоқада бўлишга буюрган. Яқинларидан узулишиб кетган одам жаннатга кирмайди.

5. Мусулмон бола доимо илм олади. Ҳар куни китоб ўқийди, дарс қилади. Қуръон сураларини, зикр-дуоларни ёдлаб боради. Иложи боришга телевизорни кам қўради. У мактаб дарсларини яхши ўзлаштиради. Исломий ва дунёвий устозларини қаттиқ ҳурмат қилади. Ўзининг билганларини бошқаларга ўргатади.

6. Маълумки, ҳар бир ишнинг ўз одоби, қоидаси бор. Мусулмон бола ана ўша одобларнинг ҳаммасини билиб олади. Юриш-туриш, меҳмон кутиш, бошқалар олдида ўзини тутиш, одамлар билан гаплашиш, ўтириш, овқат йейиш, ухлаш ва ҳоказо ишларда Расулulloҳ саллаллоҳу алайҳи ва саллам кўрсатган суннатларни ўрганиб, уларга амал қилади.



7. Мусулмон бола ширин сўз бўлади. У устозидан, китоблардан ва одобли инсонлардан чиройли сўзларни гапиришни ўрганиб боради. Укаларига, ўзидан кичкиналарга мулойим, юмшоқ гапирди. Жаҳли чиқса ҳам бақириб, жеркиб бермайди. Ҳеч ким билан жанжаллашмайди. Ҳеч кимнинг кўнглини оғритмайди.

8. Мусулмон бола кўни-кўшнилари хурмат қилади. Ҳаммага биринчи бўлиб салом беради. Касаллар ва кексалардан ҳол-аҳвол сўрайди. Уларга ёрдам қилади. Бошқаларнинг илтимосларини ўзининг ишидан аввал бажаришга ҳаракат қилади.

9. Мусулмон бола исрофгарчиликдан сақланади. Ўзининг ҳам, бошқаларнинг ҳам нарсаларини эҳтиёт қилади. Таҳоратда ва бошқа ишларда сувни оз-оздан ишлатади. Керак бўлмаётган чироқларни ўчириб юради. Дафтарларни тўлғизмай ташлаб юбормайди.

## Иккинчи қисм

10. Мусулмон бола уят ишларни қилмайди. Уят (аврат) ерларини ҳеч кимга кўрсатмайди. Бошқанинг ҳам авратига қарамайди. Ёмон суратлар ва ёмон киноларни кўрмайди. Ёмон болалар билан ўйнамайди. Биронта ўртоғи гуноҳ иш қилаётган бўлса, (сигарет чекиш, карта ўйнаш, урушиш, сўкишиш каби) уни чиройли сўзлар билан қайтаради. Савобли ишларни қилишга қизиқтиради.

11. У ҳайвонлар ва қушларга, жониворларга шафқатли бўлади. Уларни бекордан-бекорга ўлдирмайди. Уриб-

қийнамайди. Дарахтларни синдирмайди, гуллар ва ўсимликларни юлиб-топтамайди. Уларни парвариш қилади. Чунки улар Аллоҳга тасбеҳ айтиб туришади.

12. Яхши бола бировнинг ҳақидан эҳтиёт бўлади. Ҳеч кимнинг нарсасини сўрамасдан олмайди. Бошқанинг молини берухсат олиш - ҳаром. Ўзининг нарсаси оз бўлса ҳам яхши бола шунга қаноат қилади. Одамлардан нарса сўрамасликка ҳаракат қилади.

13. Мусулмон бола сахий бўлади. Аллоҳ берган неъматлардан бошқаларга ҳам илинади. Ҳадя, эҳсон, садақа қилиб юришни одат қилади. Бахиллик қилмайди. Нафси бузуқ, очкўз бўлмайди. Энг яхши нарсаларни ўзига бўлишини хоҳлайдиган худбин ҳам бўлмайди.

14. У ўзига озгина яхшилик қилган одамга ҳам раҳмат айтади. Яхшиликни унутмайди ва уни каттароқ қилиб қайтаришга интилади. Аммо ўзи кимгадир яхшилик қилган бўлса, ундан раҳмат кутиб юрмайди. Бу иши учун савоб беришини Аллоҳдан сўрайди.

15. У ҳеч кимга ҳасад қилмайди. Бирор боланинг илми ёки нарсалари уникдан кўпроқ, чиройлироқ бўлса, унга ғайирлиги келмайди. Балки ҳавас қилади. Аллоҳдан ўзига ҳам шунақа нарсалардан беришини сўрайди. Аллоҳ унга ниманидир бермаган бўлса хафа бўлмайди. Бориға шукр қилиб юради. Шунда Аллоҳ унга ҳам Ўз неъматларидан янада кўпроқ беради.

16. Яхши бола бирор инсоннинг яхши иш қилаётганини кўрса, дарров унинг айбини топишга ҳаракат қилмайди.

Аксинша, шу яхши ишдан ўзига фойда бўлмаса ҳам уни мактаб, дуо қилиб қўяди. У бошқаларга фойдаси тегадиган яхши ишлар учун ҳам хурсанд бўлади. Чунки яхши ишларни Аллоҳ яхши кўради-да.

17. Яхши бола намозхонларнинг айбларини худди ўзиникидек бекитади. Бир мусулмоннинг камчилигини кўриб қолса, уни ҳеч кимга гапирмайди. Агар иложи бўлса, ўша одамнинг ўзига чиройли қилиб тушунтиради. Мусулмоннинг хатосини баҳона қилиб, уни айблаб юриш кофирларга хизмат қилиш билан баробардир.

18. Яхши бола ўзининг биродарларини қадрлайди. Улардан бири билан хафалашиб қолса, тезда ярашиб олади. Дўстлари ҳақида яхши гумонда бўлади. Турли баҳоналарни қилиб, улардан алоқани узмайди. Агар ўзи хатога йўл қўйган бўлса, айбини тан олиб, дарҳол кечирим сўрайди. Ўз биродаридан алоқасини узиб юборган одам илмли бўлса ҳам яхши одам бўлмайди.

19. Мусулмон бола сал каттароқ биродардан ўзига нисбатан бирор хато ўтганини кўрса, ёшини ҳурмат қилиб, унга қаттиқ сўз айтмайди. Унинг олдида ўзини камтар ва одобли тутаяди. Орқасидан гапирмайди.

20. Яхши боланинг чехраси очиқ бўлади. Аччиғи келганда афтини бужмайтириб, лабини шўшшайтириб олмайди. Қовоғини солиб юрмайди. Унинг ҳаётида бирор нохуш иш содир бўлиб қолса, у Аллоҳнинг тақдиридан бўлади. Хўмрайиб олиш эса тақдирдан норози бўлиш, Аллоҳга ва одамларга зарда қилишга ўхшайди. Бунақа

сифатли одамни Аллоҳ яхши кўрмайди. Мусулмон бола одамларга ним табассум билан широйли муомала қилади. У ҳеч қашон уҳ (уф) тортмайди. Ҳар қандай ҳолатда ҳам Аллоҳга ҳамд айтиб юради.

### Ушинчи қисм

21. Мусулмон болага ота-онаси, устози, биродарлари ёки ёши катталар насиҳат қилишса, жим туриб эшитади. Гап қайтармайди. Балки уларга раҳмат айтади. Қайсарлик қилиб ўз билганида туриб олмайди. Мутакаббир кимса эса насиҳатни ёқтирмайди.

22. Мусулмон бола диний ва дунёвий ишларини катталар билан маслаҳатлашмасдан қилмайди. У ота-онасига, узтозларига, бошлиқларига итоатда бўлади. Чунки бебошлик ва итоатсизлик мусулмонларнинг ишларига зарар эткизади.

23. Яхши бола мақтанчоқ бўлмайди. У ҳаммадан кўра кўпроқ нарсани ўқиган, билган бўлса ҳам ўзини ҳали жуда оз нарса биламан, деб ҳисоблаб юради. Баъзи одам ўзича: «Мен кўп нарса ўқиганман, кўп нарсани биламан, мен бошқалардан устунроқман», деб ўйлайди. Доимо ўзини кўрсатгиси келиб туради. У мутакаббир ва ақли кам одамдир.

24. Яхши бола бировларни масхара қилмайди. Тилини чиқариб, лабини буриб, кўзини қисиб ёки қўли билан ишоралар қилиб, одамларни камситмайди. Ҳеч кимнинг

устидан кулмайди. Бошқалардан ўзини катта тутмайди. Кўчаларда кеккайиб юрмайди.

25. Яхши бола ҳамма Аҳли сунна мусулмонларни яхши инсонлар, деб ҳисоблайди. Ўзининг устозидан бошқа устозда ўқиётган болаларни ҳам биродар деб билади. Одамларнинг тинч-тотув ҳаёт кечиришларини хоҳлайди. Бошқача фикрли инсонлар билан ҳам муроса қилиб, чиройли гаплаша оладиган бўлади. Бефойда тортишувлардан узоқ юради. Ҳеч кимга зулм қилмайди. У ҳатто кофир одамнинг зулмга учраганини кўрса ҳам унга ёрдам беради.

26. Мусулмон бола чидамли бўлади. Машаққатни сабр, ибодат, дуо ва меҳнат билан йенгади. Баъзиларга ўхшаб жиззаки, инжиқ, кўрқоқ, бесабр бўлмайди. Қийинчилик келишига дўстларидан бири сабабчи бўлган бўлса ҳам уни айблашга бошламайди. Дўстни айблаш уятсизликдир. Мусулмонлар бир-бирларининг хатоларини кечирадилар. Бесабр, иймони заиф одам эса ўзини оқлаш учун бошқаларни қоралаб юради.

27. Мусулмон бола тилига эҳтиёт бўлади. Ўзининг ва мусулмонларнинг сирларини сақлайди. Бошқанинг сирини билишга уринмайди. Биров хат ёзаётган бўлса, уни ўқиб турмайди. Ота-онаси ва устозлари «гапирмагин», деган гапларни ҳеч кимга гапирмайди. Баъзи болаларнинг эса оғизлари бўш бўлади. Ўйламасдан гапириб, ўзларига ҳам, бошқаларга ҳам зарар йеткадилар. (Мусулмон бола рост гапиради. Аммо душмандан сақланиш учун ёлғон гапириш мумкин).

28. Мусулмон бола довюрак бўлади. Кофир, мунофик ва фосиқлардан кўркмайди. Фақат Аллоҳдан кўрқади. Аллоҳнинг дўстларини дўст, душманларини душман, деб билади. Душманларнинг хийла ва зарарларидан эҳтиёт бўлади. Иложи бўлса, улар билан муроса қилади. Динга зарар йетказаётган бўлсалар, уларга қарши курашади. Ислом ва иймонни тили, моли ва бор кучи билан, керак бўлса жони билан ҳимоя қилади.

29. У ҳамма соҳада: иймон, илм, ибодат ва ақлда кучли бўлади. Ўзбек, араб ва чет тилларини пухта билишга интилади. Компютерда ишлашни билади. Бадан тарбия билан шуғулланиб, жисмонан кучайиб боради. Сувда сузиш, отда чопиш, ўқ отиш ва кураш тушишни ўрганади. Баъзида футбол ўйнаб туради.

30. Мусулмон бола Исломни халқ ўртасида тарқатишга ўз ҳиссасини қўшади. Исломнинг бир қисмига эмас, ҳаммасига амал қилади. Чунки, бизнинг дунё ва Охиратдаги саодатимиз Ислом динимизга боғлиқдир. Қачон Ислом дини кучли, азиз ва мукамал бўлса, биз ҳам ўшанда кучли ва азиз бўламиз.

Мана, азиз болажонлар, шу билан китобчамиз ниҳоясига йетди. Сизларнинг ҳаммангизга бахт-саодат ёр бўлсин. Илмига амал қиладиган яхши инсонлар бўлиб йетишинглар. Бу дунёда бахтли ҳаёт кечириб, Охиратда жаннатга кириш сизларга ҳам бизга ҳам насиб бўлсин.

## Мундарижа

|                                         |    |
|-----------------------------------------|----|
| 1 Бу дунёни Ким яратган?.....           | 4  |
| 2 Аллоҳ Таоло ким? .....                | 7  |
| 3 Дин нима дегани? .....                | 10 |
| 4 Пайғамбар ким? .....                  | 13 |
| 5 Шайтон нима учун яратилган? .....     | 16 |
| 6 Аллоҳ кофирларни жазолайди.....       | 19 |
| 7 Энг сўнгги пайғамбар.....             | 22 |
| 8 Кимга ўхшаган бўлишни хоҳайсиз? ..... | 25 |
| 9 Энг улуғ китоб. ....                  | 28 |
| 10 Ислом қандай дин? .....              | 31 |
| 11 Аллоҳ – мусулмонларнинг дўсти.....   | 34 |
| 12 Икки фаришта.....                    | 37 |
| 13 Қабрдаги ҳаёт.....                   | 40 |
| 14 Қиёмат қандай кун? .....             | 43 |
| 15 Дўзах – энг ёмон жой! .....          | 46 |
| 16 Жаннат қандай жой? .....             | 54 |
| 17 Мусулмон бола қандай бўлади?.....    | 61 |